

Pablo Zubiarrain

«Ernani Txikia»


# GAZIAK ETA GOZOAK

---

Erri-literatura  
Auspoa Liburutegia

---

Bertsoak



**ETOR**

# **GAZIAK ETA GOZOAK**

Auspoa Liburutegia

194

Pablo Zubiarrain  
«Ernani Txikia»

# GAZIAK ETA GOZOAK

(Bertsoak)



Zuzendari - Antonio Zavala



EDITORIAL

**ETOR**

ARGITALETXEA

© EUSKO KULTUR ERAGINTZA ETOR S.A.

Juan de Bilbao 13. 20003 DONOSTIA

I.S.B.N.: 84 85527-36-4.

D.L.: NA. 790-1988

Irar-lanak: GRAFICAS LIZARRA, S.L. - Lizarra

## ITZAURREA

Orain idatzi deten bigarren liburu au, parte bat lagunak bultzatuta egiña da. Beti ari zitzaizkidan:

— Ea beste bat noiz azaltzen diguken, guk ba-  
zeukagu letzeko gogoia ta.

Alaxe asi ta egin det, Euskalerriko seme ber-  
tsozale guztiak piska bat goza dezaten, bakoitza  
bere gustokoarekin.

Neroni ere alaxen gozaten naiz, batzuetan bes-  
terenak entzuten da batzuetan neronenak idazten,  
bestetarako ez gera asko gauza ta.

Zartu egin baigera, eta orain ontantxen denbora  
pasa bear, geren griña auxen degu ta. Gaiñera, be-  
ti-betikoa. Ume-umetatik asi ta il arteraiño-  
koa izango da noski .

Neretzat gaur ere ez dago bertsoak, esku-pelota eta trikitixa bezelakorik. Oietxek ditut nere gus-tokoak; geien gustatzen zaizkitenak, oso gureak di-ralako.

Beste batzuei beste zerbait gustatuko zaiote, le-gea dan bezela. Gaiñera, bakoitzak berea nai iza-ten du.

Ni bertso jartzeko lan ontan ez nintzan segu-ru asko sekula asiko, nere anai bat eta nere lagu-nak izan ez balira. Aiengatik segitzen det eta ne-roni ere gustatzen zaidalako. Utzi-aldi batzuek egingo ditut. Baiñan berriz ere, nere gustoko gaiak billatzean, idazten jarraituko det, euskaldunen ja-nari gozoa auxen da ta.

Eta, gaiñera, ez dedilla faltatu gu bizi geran arte; eta gero ere ez. Jarrai dezala urte askoan, mundua mundu dan arte.

Onekintxe bukatzen det. Zuek, danentzat es-keintzen det nere bigarren liburu au, eta agur da-noi! Beste bat arte!

*Pablo Zubiarrain*  
*«Ernani Txikia»*  
*1988'ko Maiatzaren 23'an*

## AMETS GOZOA GAZITU

Bertso auek jarri nituen, baserritar guztia kalera zetorrela-ta. Izan ere, ain modan eduki genduen ori bolara batean. Baiña kalean ere zakurrak ankutsik. Ametsetan gozo ikusten dana, gazi biurtu, ta orixe gogoratuta.

1/ Nik ere badet anai maite bat  
oso gazterikan illa,  
ark Jainkoari eskatzen zion  
gutaz erruki zedilla.  
Baserritikan kalera datoz  
neskatxa eta mutilla,  
pake santuko zerua utzi  
ta inpernuaren billa.

- 2/ Burua aizez betearekin  
ain mundu gutxi zutela,  
aita ta ama utzi zituzten  
negarra zeriota.  
Gaztetasunak azkar aldegin  
txoriak engan bezela,  
orain or dabil bazterrik bazter  
nora jo ez dakiela.
- 3/ Baserri artan utzi zituzten  
maitasuna ta jatena,  
kristauarentzat mundu ontan dan  
gauzarik aberatsena.  
«Nik ala ere etxetik iges,  
ura gurasoen pena,  
ametsa oker irten zitzaidan  
ustez ikusten nuena».
- 4/ Menditik bera jetxi ziraden  
ta orain kalean bizi,  
an ere gauzak gora dijoaz  
naiz piska bat irabazi.  
Artu orduko jornal guzia  
eskuetatik igesi,  
ustez gozoa genduen gauza  
laister biurtu zan gazi.



- 5/ Gazteak arro dabillenean  
aixa egiten du pekatu,  
bizio txarren jabe eginda  
osasuna ere ondatu.  
Kale zar ortan etzuen beste  
aurrerapenik billatu,  
berriř mendira igo zan eta  
amatxok antxen sendatu.
- 6/ An zegon lengo maitetasuna  
ta an zegon lengo jana,  
amaika aldiz damutu nintzan  
etxe artatik joana.  
Uste gabeko mirari batez  
bildu giñan alkargana,  
orain zorutzen an bizi dira  
semea, aita ta ama.
- 7/ Jaio orduko bularra eman,  
garbi jantzi ta txukundu,  
bi besoakin estutu eta  
al zan maizena laztandu.  
Zuen onena emanaz azi  
eta gaiñera gizondu,  
guk gurasoa bear ainbeste  
eztegu maite izandu.

8/ An baserrian bizi zaitezte  
Jainkoa eskerturikan,  
ori egiten duenak gero  
ez du izango penikan.  
Mundu zar ontan ez da dirurik  
ta aberastasunikan  
guraso onen maitetasunak  
aiña balio dunikan.

9/ Gazteak uste zuten kalean  
billatutzea zerua,  
baiña ederki gazitu zan len  
gozo zan bizimodua.  
Zenbat gurasok ote dauka gaur  
negarrerako gogua?  
Maitasunikan ez baldin bada  
alperrikan da dirua.

10/ Ta kalean zer billatu zuten?  
Droga eta benenua.  
An oroitu zan zeñen ona dan  
mendiko aize sanua.  
Biotzeraiño sartu zitzaion  
egin zunaren damua,  
ta esan zuen: «Ni berriz ere  
lengo tokira banua».

11/ Bere semea ama maiteak  
zuen garaian ikusi,  
lepotik eldu ta estutuaz  
musuka zitzaion asi.  
Esaten zion: «Gelditu emen,  
ez berriz jua igesi,  
gu laister ilko gerade ta zu  
izango zera nagusi».

## **ORAINDIK EZ DA BUKATU**

Bertso auek, azkenengo gure artean izan ziran botoen gaiñean jarriak dira, ainbeste saltsa ta ainbeste kontu aditu ondoren.

- 1/ Gure artean zer pasako zan ikusten genduen aurrez, okertu giñan betiko eta zuzentzen ez dago errez. Gu alkarrekin emen borroka, Madrid'en etsaiak parrez, ez ote gera ume biurtu gizondu egin bearrez?

- 2/ Batasunaren izen eder au  
ez degu gutxi aditu,  
baiñan eskatzen zutenak berak  
dute erditik partitu.  
Gure okerrak Ama Euskera  
gaixoak pagatzen ditu,  
Ama iltzean bere semeak  
gero nork maiteko gaitu?
- 3/ Badakizute bere umeak  
nola il zuten luartzan,  
nik erri oni ematen diot  
animali orren antza.  
Loraz beterik bear genduken  
Euskalerriko baratza,  
emen besterik ez da ikusten:  
otea eta arantza.
- 4/ Gezurra maite dan errietan  
indar gutxi du egiak,  
ta euskaldunak badegu ordu  
zabaldutzeko begiak.  
Batasun on bat egin balute  
euskaldun agintariak,  
etzioten, ez, eskuetatik  
iges egingo txoriak.

- 5/ Batasunaren soka ordea  
nola baizegon etenda,  
ara orain zer gertatu zaigun  
merezia genduen-da.  
Txoriak iges errez egin du  
berak biali zuten-da,  
denbora joan da geroko pena  
alperrikan izaten da.
- 6/ Orain zertako ari zerate  
besteak errudun jartzen?  
Danok generala pekatariak  
zertan ez degu aitortzen?  
Barkaziorik ez dan tokian  
zail izango da alkartzen,  
ea igesi joan zan txoria  
geiago ez dan etortzen.
- 7/ Gure lurra da Euskalerrria  
ta izkuntza berriz Ama,  
gure etsaiak ondo dakite  
legez au gurea dana.  
Zutikan egon nai eta ezin  
badabilki naiko lana,  
ez al diogu beintzat egingo  
luartzak egin zuana.

- 8/ Gaixoa penak ari du iltzen  
sufrituz beste min gabe,  
gerok ematen dizkagulako  
Amari milla naigabe.  
Xenpelar zanak esandakoak  
egi biurtu dirade,  
zertan gabiltzan ez dakigula  
ontan galduko gerade.
- 9/ Gure artean gertatzen danak  
jartzen digu zer pentsatu,  
gaitz bat badegu: aitortu nai ez  
danok degula pekatu.  
Anai arteko borroka txar au  
zeiñek ote zun asmatu?  
Kain da Abel asi ziran da  
oraindik ez da bukatu.

## **JESUS ABREGO'RI**

Bertso auek, berriz, neronek askotan jokatzen ikusi nuen eta ain aparta ta arrigarria zan Jesus Abrego'ri jarri nizkion.

- 1/ Amalau urterekin asi ta  
amaseirako nagusi,  
geroztik artan segitu zuen  
ta iñork etzuen autsi.  
Gizonak ez du bere aurrean  
obeagorik ikusi,  
gizarajoak arek ez al du  
oroigarri bat merezi?



- 2/ Doai apartak izan zenitun  
gure Jainkoak emanak:  
saka, aire ta errebotea,  
gero gaiñontzeko danak.  
Gauz oiek ondo bazekizkien  
Jesus izena duanak,  
zer izandu zan ondo dakigu  
ezagutu genduanak.
- 3/ Danen gaiñetik ibili zuen  
bere nagusitasuna,  
baiñan iritxi zitzaion noizbait  
pelota uzteko eguna.  
Ain zan bikaiña eta aparta  
bere remonte txukuna,  
geroztik ura izan da emen  
beti gogoan deguna.
- 4/ Guk ere ondo bagenekigun  
onena, Jesus, ziñala,  
aztia bezin jakintsua ta  
izena bezin apala.  
Alperrikako pisua gutxi,  
dana zaiña ta azala,  
danon Jabeak gure artean  
luzaro gorde dezala.

- 5/ Izena Jesus jarri zioten,  
apellidua Abrego,  
arrigarrizko pelotari bat  
ura izandu zan gero.  
Plaza danetan entzundakoa  
makiña bat txalo bero,  
emen ikusi degun onena  
zestua egin zan ezker.
- 6/ Zutik jarri ta danak txaloka  
lenbiziko jugadatik,  
bera egiten ari zan lana  
ondo eskertzeagatik.  
Espiritu bat zirudin plazan  
gizona izanagatik,  
Jesus bakarra izandu baizan  
aparta besteetatik.
- 7/ Bista ona ta beso bizia,  
zestuan berriz imana,  
arentzat etzan pelota txarrik,  
ondo artzen zuen dana.  
Gero ikusi egin bear zan  
arek egindako lana,  
zerbaitengatik jaso zituen  
ainbeste txalo ta fama.

8/ Arbolik ederrena zu ziñan  
pelotarien baratzan,  
Jesus izena entzun orduko  
ezin kabiturik plazan.  
Danok egoten giñaden pozez  
noiz asiko zan zalantzan,  
amaika begi gozatu zuen,  
alakoxea izan zan.

## EPELE'KO ITURRIA

Bertso auek jarri nizkion Epele'ko Iturria esaten genion bati. Izan ere, ainbeste trago egiñak bai-gera gu andik, eta artaz oroituta.

- 1/ Iturri ura antxen daukagu  
erreka baten onduan,  
gu mutikoak giñala ere  
an ezagutu genduan.  
Txorro artatik trago ederrak  
egiñak gera orduan,  
ezta iturri obeagorik  
asko izango munduan.

- 2/ Mendira joan da asko nekatu,  
egarritzen giñanean,  
arkaitz artako iturrira gu  
joaten giñan zuzenean.  
Nai gendun aiña bai edan ere  
bearra zegoenean,  
zer atsegiña ematen zuen  
gorputzaren barrenean!
- 3/ Mendingan zauden iturritxoa,  
esan det amaika aldiz  
gure botika ziñadela zu  
geundenerako egarriz.  
Arkaitz ortantxe jaioa ziñan  
ez dakigu zer mirariz,  
baiñan fedea izan dezagun  
guztiona dan gidariz.
- 4/ Zartu naiz baiña txoko artara  
joaten naizen bakoitzean,  
zu ikusita alaitasun bat  
sentitzen det biotzean.  
Arkaitz artatik edana bainaiz  
mutikoa nintzanean,  
etzaitezela beintzat agortu  
Jainkoaren izenean.

- 5/ Danon Jabeak jarri zinduen,  
arkaitza, ura ematen,  
kristau guziak beartutzean  
andikan edan zezaten.  
Legorteak ez zaitu agortzen,  
otzak etzaitu jeltzen,  
zu bai zeradela mirari bat  
jarri ezkeru pentsatzen.
- 6/ «O, Jaungoikoak zer mirariak  
egin zizkigun munduan!»,  
begira jartzen giñaden eta  
askotan esan genduan.  
Arkaitzak nola lezaken sortu  
oinbeste bere barruan?  
Zuk beti berdin ematen dezu  
udaran eta neguan.
- 7/ Tantoka ikusi izan ditugu  
izardituta arriak,  
eta aietxek izaten dira  
arkaitzeko iturriak.  
Ikusten ari geraden gauzak  
ez al dira mirariak?  
Kristauarentzat begien bistan  
noizbait Norbaitek jarriak.

8/ Iturri ortan edaten zuten  
mendiko ardi gaixoak,  
beste egazti askok ere bai,  
txoriak eta zozoak.  
Ni ere noizbait akordatu naiz  
zuri jartzea bertsoak,  
oroimengarri kanta dezaten  
Epel-alde'ko auzoak.

## GURE ARRANTZALEAK

Bertso auek jarri nituen, gure arrantzale giza-  
rajoak beti munta pagatzen nola ari baitiran, ori-  
xe gaitzat artuta.

- 1/ Ogia itxasotik jan bear  
ta or dabil beldurtuta,  
noiznai barkuak kentzen dizkate  
prantzesak arrapatuta.  
Beren portura eraman da an  
jartzen dituzte lotuta,  
ekartzen ere geio ez utzi  
pagatu artean munta.



- 2/ Mundu guztian ugaritutzen  
nola dijoan lapurra,  
aurki oientzat bearko da guk  
egiten degun apurra.  
Lendikan ere zer pasako zan  
artuta geunden beldurra:  
prantzesentzako itxasoa ta  
España'rentzat lurra.
- 3/ Ezin bizia badator eta  
asi gerade nastutzen,  
emen urtetik urtera gauzak  
ari baitira estutzen.  
Ikusten degun etorkizunak  
ez gaitu asko poztutzen,  
berriz e onek gerra dakarki  
au ez badute moztutzen.
- 4/ Dotriñak jarri arren danentzat  
egi borobil askuak,  
mundu ontako agintariak  
dabiltza ori aztuak.  
Berak beiñere faltarikan ez,  
gu gera beti gaiztuak,  
pasatzen ari geranak emen  
trantze larri ta estuak.

- 5/ Gerra-ontziak jarri dituzte  
arrantzaleen goardian,  
aurrera iñor pasa eztedin  
aik jarritako neurrian.  
Legorrean e dana etsaia  
Españia'n da Prantzia'n,  
ta gu ementxe purgatoioan  
bi inpernuren erdian.
- 6/ Kulparik gabe beti supritzen,  
badegu nork agindua;  
guztiok degu erru piska bat:  
errespetoa galdua.  
Bi milla urte diran garaian  
bukatzen bada mundua,  
eztute asko agindu bear,  
gaiñean dute ordua.

## ANTZIÑAKO GURASO ZARRAK

Auek, berriz, gure antziñako guraso zarren bizitzaz pentsatzen jarrita ipiñi nituan: aien mundua, beren oiturak, errespetoa, gaur ez daukagun maitasuna eta beste milla gauza. Igande-goizetan meza nagusia, arratsaldean bezperak eta illuntzean erro-sario santua. Ori etxe askotan egiten zan.

Etzan gaur bezelako aurrerapenik. Aitzurra ta laiaz ibiltzen ziran soroak, urte guziko artoa eta garia egiteko. Baba beltza, ardi-gazta, txerrikia, naiko eiza mendian eta amurraiak ibaian. Etzala dirurik izaten? Ez-ta gaur aiña bearrik ere. Bizitza lasaiagoa, alkarrentzat maitasun geiago.

Gaur, ordea, katean lotutako zakur amorratuak dirudigula jarriak gaude, alkar ikusi eziñik bezela. «Ez badek pentsatzen nik bezela, i txarra ta ni ona». Ara asko ikasteak zertara ekarri gaituen.

- 1/ Esku zabalekoak  
ta biotzez onak,  
oiek ziran emengo  
urrezko amonak.  
Izarditik egiñak  
zituzten txanponak,  
alakoak dira gaur  
falta ditugunak.
  
- 2/ Goizean jeikitzean  
otoitzak Jaunari,  
eguneko nekeak  
eskeiñi Berari,  
eta gero ekingo  
zioten lanari;  
ondo aztuta dago  
oitura zar ori.
  
- 3/ Gaur ainbeste eskola  
ez izan arren len,  
oitura ona asko  
izan ziran emen.  
Bat jaungoikotasuna  
zeramaten barren,  
olakoxe amonak  
izaten ziraden.

4/ Lengo amonak ziran  
gure amen amak,  
gaitz asko egin gabe  
emendik joanak.  
Zeruan alkarrekin  
antxe daude danak,  
Norbaitek sarituta  
egindako lanak.

5/ Aurrera egin omen  
degu gauz askotan,  
ez ote zan ohea  
egotea lotan,  
ainbeste zikinkeri  
ikusitzekotan?  
Negarra sartu da gaur  
fameli prankotan.

6/ Orduko amon aiek  
dakazkit goguan,  
atzeratuak omen  
zirala orduan.  
Ara aurrerapenak  
zer ekarri duan:  
gaur e ezin bizia  
orduko moduan.

- 7/ Iñulabarrez irten,  
goizean etxera,  
erdi drogatutako  
mozkorren antzera.  
Zerbait esaten asi,  
aundigoak bera,  
orixen da askoren  
gaurko ibillera.
- 8/ Ori egiten dute  
oraingo gazteak,  
batzuek ez bada're  
beintzat bai besteak.  
Nun ditugu orduko  
amona maiteak?  
An goian, zabaldua  
Norbaitek atearak.
- 9/ Amon aiek e gazte  
izan ziran emen,  
baiñan etxera zintzo  
illundu baiño len.  
Gurasoen ordenak  
zorrotzak ziraden,  
libertade geiegik  
ara zer dakarren.

## ZOZO BATEN NEGARRA

Bertso auek jarri nituen bein, zozo baten gertaera ikusi ondoren. Gaixoari bere umeak kendu zizkaten kabitik. Aita ta ama karraxika, zerbait egin naiean. Aita tiroz il zuten, ta ama eritu. Egoa autsi zioten. Eta gaixoak geroztik ez du kantatzen. Ain naigabetua gelditu baizan.

- 1/ Udaberrian sartu gerade  
aldeginda neguari,  
orain mendiko arbol gaiñetan  
txoriak pozez kantari,  
berak biotzez ain maite duten  
Jaunaren eguzkiari,  
argi berri bat ekarri naian  
illa dagon munduari.

- 2/ Kabi berriak egiten laister  
asiko ziran zozoak,  
guk ere pozez entzuten giñun  
beren abesti gozoak.  
Aik egiñalak alaitu naian  
gizonak eta basoak!  
Maitasunaren zabaltzailleak  
zuek zerate, gaixoak.
- 3/ Egun batean ikusi nuen  
txori bat bere kabian,  
umeak zeuzkan jaio berriak  
artean larru gorrian.  
Neri begira etzeukan arek  
makar aundirik begian,  
igartzen nion esan naiean  
andikan joan nendian.
- 4/ Jaio berriak izan gaixoak  
eta, ez ikusi arren,  
azkar igartzen zioten amak  
berentzako zer zekarren.  
Gora begira jarriko ziran  
al zutenikan azkarren,  
amak zekarren jan gozo ura  
berentzat izatearren.



- 5/ Bereak izan nunbait gaixoak,  
maite zitun biotzetik,  
naiz-ta etziran zuzen ibili  
berak nai zuen bidetik.  
Ondo lumatu baiño lenago  
egatu ziran kabitik,  
geroztik amak malkoa pranko  
bota du bere begitik.
- 6/ Gaixoak egan gutxi egiten,  
uste bai bazekitela;  
arrapatu ta kaiolan sartu,  
bizi guziko kartzela.  
Amak jakindu zuen garaian  
umeak preso zeudela,  
geroztik ortxen dabil negarrez  
zer egin eztakiela.
- 7/ Gizona dala animalia  
ez al zaizu iduritzen?  
Geok ikusi izan ditugu  
gaixoak tiroka iltzen.  
Askatasuna beste gauzarik  
eztan garaian aditzen,  
errugabea zertan ez utzi  
munduan libre bizitzen?

## AITON BATEN KEZKAK

Bein aiton batek bere kezak eta larritasunak eta erretiro eta ezin bizia kontatu zizkidan. Gizarajoa estu samar baizebillen. Eta artaz oroituta bertso auek ipiñi nituen.

- 1/ Lengo batean jakintsu bati entzuten egon giñaden, bi urte barru lanikan eza doblatuko zala emen. Ta orrek ondo badakizute zer ondorena dakarren, obe dezute zuzentzen asi dana okertu baiño len.

- 2/ Agindu asko egiten dute  
baiña gutxi aurreratu;  
agintariak, badaukazute  
zuek ere zer pentsatu.  
Erriak bere arrazoia du  
bizitzeko lain eskatu,  
etzazutela beartsurikan  
oinbesteraifño zanpatu.
- 3/ Guk badakigu emen norbaitek  
bear duela nagusi,  
baiñan bizitza ez galestitu  
ta geiegi irabazi.  
Kontzientziaz kristau bezela  
nai badezu lasai bizi,  
zuzentasunak emen etxetik  
asi bear du lenbizi.
- 4/ Engañatzeko piska bat eman  
ta gero doblea kendu,  
emen jarrita dagon legeak  
beintzat ala egiten du.  
Badakizute zenbat bear dan  
jazteko eta mantendu,  
zuzentasunik ez izateak  
gerra berak ekartzen du.

- 5/ Erretiroa artuta dagon  
aitona baten aotikan,  
aditzen nion bizitzeko're  
ia etzeukala pozikan.  
Ardo piska bat ere naita're  
ezin osatu sosikan,  
duro batzuek eman nizkion  
ondo errukiturikan.
- 6/ Gizarajoak eskertu zidan  
malkoz bustita begiak,  
esaten zidan: «Sinistu gero  
oiek dirala egiak».  
Amabost milla ditut nereak,  
ogei andrea ta biak,  
orrekin jarriko nituzke nik  
dauzkagun agintariak.
- 7/ «Baratzui-zopa bakarrik janda  
askotan naiz oeratu,  
eta —ala zion gizarajoak—  
oi ez dedilla faltatu».  
Zapata zarrak konpondu nizkan,  
berriak erregalatu,  
gizarajoak ez daki orain  
eskerrak nola pagatu.

8/ Esango dute: «Guk langillea  
maite degu biotzetik».  
Baiñan gu ere aspertu gera  
betiko arpa jotzetik.  
Bistatik gorde orduko parra  
egingo'izute atzetik,  
or ikusten da zenbat daukaten  
gizontasun da lotsetik.

## **GURASO ZARREN BIZIMODUA**

Bertso auek jarri nituen lengo guraso zar aiek egiten zituzten lanak eta nekeak akordatuta. Orduan laian eta karobi zarrakin eta aitzurrez egiten baizituzten danak.

- 1/ Ogibidea nekazaritza  
zuten lengo gurasoak,  
lur zekenean zenbat izardi  
ixuri zuten gaixoak?  
Nun dira lengo gaztain da pago  
ta ardi-larre gozoak?  
Gaur badirudi lutoz jantziak  
daudela gure basoak.

- 2/ Alegin danak egin zituen  
jendeak piñua jartzen,  
ta ordutikan asi ziraden  
emengo artzaiak galtzen.  
Kukuak ere mututu ziran,  
orain ez dute kantatzen,  
mendian ere ez degu lengo  
usai eder ura artzen.
- 3/ Lur zekenean latz oitua zan  
euskaldun nekazaria,  
soroak laiaz jiratzen ziran,  
aitzurrez egin garia.  
Gero etxean izaten zuten  
urte guziko ogia,  
ura izaten zan ixuritako  
izardi danen saria.
- 4/ Lenago sasi utsak ziranak  
landu ta soro berriak,  
garai bateko guraso zarrak  
ziraden emen jarriak.  
Lurra zegona baratza egin,  
pilletan jarri arriak,  
eta orduan paradiso bat  
zirudin Euskalerrriak.

- 5/ Dana bear ta ardiz beteak  
Euskalerriko basoak,  
ogibidea ura baizuten  
orduko artzai gaixoak.  
Apal ondoan asiko ziran  
amonaren errezoak,  
Jaunari ondo eskertu naian  
nekeen sari gozoak.
- 6/ Karobi zarrak bukatu ziran,  
ezta egiten besterik,  
lengo aitonak bezela ezta  
saiatzen gaurko gazterik.  
Argatik lurra ez du ematen  
garai bateko protxurik,  
mendiak ere ez daukate gaur  
len zedukaten itxurik.
- 7/ Aurrerapena bear omen zan,  
ara galanta ekarri,  
baiñan gaur ere bizi eziñik  
jendea ementxe larri.  
Emen gizonak errespetoa  
izatezkero alkarri,  
agintariak, obe dezute  
gauzak berdiñago jarri.



## IDI ZARRARENA

Aurten eskursio bat jarri digute, gu bizi geran erri ontatik Rioja aldera. Antxen izan giñan gu ere, egun eder bat paseaz.

Logroño'raiño joan giñan, ta an batzuek elizak ikusten, da beste batzuek dendak eta kaleak, eta tabernak ere bai. Danetik. Ta gero Haro'ra bazkaltzera. Bai ederki bazkaldu ere.

Urrengo egunean jarri nintzan pentsatzen: anima apartatuta, idi zarrak bezela gera. Bada esae-ra bat: «Idi zarrak ere, ondo jan da deskantsuan egon ezkeru, ipur-saltoka asten dituk». Eta guri ere zerbait olako pasako zaigu.

Aruntzean, danak ixil-ixilik joan giñan. Baiñan bazkalondoan bazan berriketa: batzuek, bazkari ona zala; beste batzuek, ez artaraiñokoa. Beste

batzuek, bati arkume-puska aundiagoa tokatu zitzaiola; besteak, ura etzala arkumea; ura borroa zala; eta besteak, berriz, ura antxumea zala.

Bai ta ez, aiek zalapartak! Danak arrazoi ta txandik artu ezin. Bazkari onaren indarra. Guri ere idi zarrarena gertatzen nunbait.

1/ Lasarte'tikan atera eta  
Estella'n gelditu aurren,  
baiñan bigarren ekiñaldian  
Logroño'n gelditu urren.  
An genbiltzan kalean,  
zerbait artu naiean  
tabernan sartu giñaden,  
bai antzeman e: «Berriak dituk»,  
an azeriak zai zeuden.

2/ Amabi duro baso ardoa  
eta sei baso-erdiak,  
ala kobratu ziguten beintzat  
Logroño'n tabernariak.  
Erretiro kaskarrak  
dauzkagu lengo zarrak,  
poltsatik ere urriak,  
kastigu danak izango dira  
guk pagatzeko jarriak.

- 3/ Andik onera ekarri eta  
merkego saldu Lasarte'n,  
ta ea ori nola liteken  
galdera egin nioten  
ango bi gizon zarri,  
begiratzuz alkarri;  
ta parrez ala zioten:  
«Gauzak alaxe izaten dira»  
laster erantzun zidaten.
- 4/ Ia bi ordu Logroño'n pasa  
ta gero andik Haro'ra,  
jan eta edan egin genduen  
ia lepotikan gora.  
Asi zan iskanbilla,  
arrotu zan umilla,  
kanbiatu zan denbora;  
gure jan onak arrotu giñun  
idi zarraren modura.
- 5/ Matsa ta gari tartean pasa  
genduen egun lasaia,  
ura kanpoen edertasuna  
ta ura berde-usaia!  
Andreak diskutitzen  
ta guri ez utzitzen,  
berak beti arrazoia;  
oraindik ere ongi jatean  
etortzen zaigu sasoia.

- 6/ Bide guzian joan ziraden  
alkarri kejak kontatzen:  
anketan reuma zeukatela ta  
ura etzala sendatzen.  
Bazkaldu eta gero  
jarririk erdi bero  
jendea asi zan dantzatzen;  
irrintzia ta salto egiñez  
reuma etzan gogoratzen.
- 7/ Etxetik irten giñadenean  
etzan entzuten itzika,  
baiñan bueltan ez genduen, ez,  
joan giñaneko antzika.  
Txandikan artu ezin,  
gu ez giñan edozin,  
saltoka ta irrintzika;  
bazkari ona izango zan gu  
sendatu giñun botika.

## BESARKADA BAT

Orain dala urte asko Ameriketara joandako anai bat badu nere emazteak, eta urteak bere berrik jakin gabe pasa ditugu. Baiñan bizi dan arrastoak jakin berri ditugu bere semeari esker, eta ordaiñez bertso aukeratu bializkion.

- 1/ Au orrelaxe idatzitzeko zure arrebak esan dit, besarkada bat al dan aundiña artu dezazun gugandik. Irurogei ta bi urte dira joan ziñala emendik, karta batetik ikasi degu bizi zerala oraindik.

- 2/ Zure berriak bialtzen ditu  
zerorren seme prestuak,  
ta nik ordaiñez orain emendik  
bialtze'izkizut bertsuak.  
Bere semeak or Arjentina'n  
asko ditu Gipuzkua'k,  
ta siñistatu emen zuentzat  
gu ez gaudela aztuak.
- 3/ Badakigu, bai, urteak asko  
egin ziñula mendian,  
zaldi gaiñean egun osoak  
arrantxo baten goardian,  
ia kontatu ezin litezken  
bei-mordo baten erdian,  
ta atsedena artuaz orain  
or omen zaude errian.
- 4/ Lur maite ontan ez egon arren  
joan ziñaneko garaiak,  
besarkada bat emateko zai  
emen dauzkazu anaiak.  
Gure biotza pozez jarri du  
zuek ikusteko naiak,  
jaioterrira etorri eta  
egingo ditugu jaiak.

- 5/ Or ere urte-mordoa bear  
lanetik aberastutzen,  
gutxitan beintzat oso zaila da  
ez baldin bada ostutzen.  
Zuen berriak jakiteak gu  
ez gaitu gutxi poztutzen,  
oso maitea izandako bat  
ez da nolanai aztutzen.
- 6/ Aita zurea ta dezun ama  
emendik joanak dirade,  
orain or bizi diranak baiño  
aik emengoak alare.  
Ta zu, illoba, etorri lasai,  
osaba-izebak zai gaude,  
emengo arbolen zaiñetatik zu  
ere sortua zerade.
- 7/ Osaba-izebak emen dauzkazu  
egiñak naiko zartzera,  
baiñan zuentzat gordetzen degu  
lengo maitasuna bera.  
Etorri zaitez zere odoleko  
sendiak ezagutzera,  
aspaldi ontan zure zai dagon  
aita jaio zan etxera.

## **GIZON ZUR BATEN KONTUAK**

Bein, Naparroa'ko erri batera joan eta an esan zizkidan gizon batek erri artako gizon zur baten kontuak. Ezkondu omen zan, baiña bai azkar apartatu ere. Bialdu egin omen zuen andrea, asko jaten zuelako; ta bakarrik bizi omen zan, pezeta bat gastatzeko beldurrez, goseak amorratzen. Ta esan zidaten dozen erdi bat bertso jartzeko, ta alaxe jarrriak dira onako auek.



- 1/ Esan zidaten: «Gizon zur oni  
jarri akizkak bertsoak,  
amar baserri bereak ditu  
eta gaiñera basoak.  
Errukarriak lurak arekin  
muga dituzten gaixoak,  
izen berria orain *Sekante*  
jarri diote auzoak.
  
- 2/ Bizi guztia pasatu zuen  
auzoarekin erritan,  
juizioak e diruarekin  
irabaziaz erditan.  
Limosna asko etzuen utzi  
etxe ondoko ermitan,  
neri bai munta nenbillelako  
bere soroan erbitan.
  
- 3/ Langillea ta zintzoa zala  
ezin liteke ukatu,  
bestela ezin zeukan aiñeko  
diru-mordoa pillatu.  
Modan jazten da trajetan arek  
etzuen asko gastatu,  
illobak eta abogaduak  
etziran gaizki gozatu.

- 4/ Bizi guztian galtza-pare bat,  
gaiñera zikiñ-zikiña,  
listaiarekin berak josita  
zakuarekin egiña.  
Petatxuak bai aurre ta atze  
beraren urteak aiña,  
sastreak eta dendak akabo  
danak berdiñak bagiña.
- 5/ Buru guztia soildu zitzaion  
eta bizarra luzatu,  
guraizeakin moztutzen zuen  
eta alaxen pasatu.  
Erri artako barberorikan  
etzan arekin gozatu,  
kolonia ta jaboitan ere  
etzuen asko gastatu.
- 6/ Otzikan ere etzuten pasa  
aren gorputza ta oiñak,  
nola baizeuzkan txikitatikan  
azal lodia egiñak.  
Dana etxeko materiala  
albarka ta kaltzetiñak,  
ardi-illea biurrituta  
etxeko jenero fiñak.

Ia illean zegoela, illoba bat joan oman zitzaion ikustera, ta ala esan omen zion:

— Beste urte beteko bizia baneuka, beste mila duro sobratuko nizkiken.

## ILLARGIA

Bein, nere lagun bat eta biok parranda pixka bat egin da etxera gentozela, illargiari begira jarri ta esanaz egon giñaden:

— Au ere Norbaitek egin ziken, ba!

Oraingo inmentoreak baiño obeak bazirala noizbait aritu giñan. Orixe gogoratu ta jarriak dira bertso auek, zerbait jarri bear-da.

1/ Zu nork egin zinduen  
goi ortan, illargi?  
Asko lezaken Batek,  
ikusten da garbi.  
Batzuetan oso ta  
besteetan erdi,  
gabaz mundu guztian  
egiten du argi.

- 2/ Gaur ere mundu ontan  
azkarrak badia,  
badakigu ematen  
bakoitzai beria.  
Illargirik ez dute  
egiten ordia,  
obe degu lengoan  
eduki fedia.
- 3/ Gaur gera jakintsuak,  
badakigu dana,  
baiñan sinismen gutxi  
lengo gauzengana.  
Aintzakotzat ez artu  
aita eta ama,  
ori da emen sarritan  
egiten dan lana.
- 4/ Norbaitek guretzako  
aspaldi jarriak  
or goian eguzkia  
eta illargiak.  
Nor ez gaitu poztuko  
beren mirariak?  
Jainkoaren parolak  
dira oiek biak.

- 5/ Illargia nai dute  
gizonak artu ta  
besteren terrenoan  
dabiltza sartuta.  
Ea gelditzen diran  
bideak galdua,  
Jaunak lengo lekuan  
aginduko du-ta.
- 6/ Lurrarekin batean  
sortu zan illargi,  
illuntzen zuenean  
egiteko argi.  
Zu sortu zinduenak  
bazekien ongi,  
mirari bat zerala  
ikusten da garbi.
- 7/ Gaur gizonak zer gauza  
ez ditu sortuko?  
Satelite berriak  
eta milla truko.  
Alare illargia  
ez dute artuko,  
etsairikan ez baita  
zeruan sartuko.

8/ Millaka ta millaka  
milloiak gastatu,  
baiñan an ezin dira  
betiko geratu.  
Zer egiten dezuten  
ondo erreparatu,  
obe dezute bea  
ondo gobernatu.

9/ Gizonak ezin lortu  
illargi ta izarrik,  
satelite guztiak  
dirade alperrik.  
Ez du menderatuko  
Jaunaren indarrik,  
an naikoa da lengo  
Jabea bakarrik.

## BARRUTIK NEGARREZ

Orain gutxi Kanbo'n izan naiz, eta pentsatzen jarri garai batean dana libre izan giñala; eta orixe gogoan artu ta alaxe jarriak dira bertso auek.

- 1/ Zoragarrizko gauzak baditut  
nere begiz ikusiak,  
Isaba'tikan gora asi ta  
dauzkagun gauza guziak,  
ango ardien zintzarri-otsa  
ta beorren irrintziak.  
Naiz ondo jakin bat geradela  
gure zazpi probintziak,  
alare muga jarri ziguten  
Españi eta Frantzia'k.



- 2/ Lur au guretzat egiña zuen  
guztiona dan Jabeak,  
baiñan etsaiak sortu zitzaizkan,  
gaiñera lotsagabeak.  
Arrezkeroztik ditugu emen  
olako atsekabeak,  
euskaldunari utzi nai ezik  
gordetzen beren legeak,  
ordutik galdu ziraden emen  
Aitorren libertadeak.
- 3/ Beldurgarria beti izan da  
arma gogorren indarra,  
txikia azkar ondo zanpatu  
eta gaiñetikan parra.  
Ondo zekiten nola giñaden  
gu fameli bat bakarra,  
orretxengatik jarri ziguten  
bizi guztiko negarra,  
jakin zazpiak bat gerala ta  
aparte bizi bearra.

- 4/ Euskalerriko mendietan gu  
libre oituak ibiltzen,  
artzantza eta lurrak ematen  
zuenarekin bizitzen.  
Gure arraza garbia zan len,  
orain ari da zikintzen;  
Ama negarrez ikusi arren  
eta umeak sufritzen,  
gure etsaiak diraden oiek  
ez dira asko kupitzen.
- 5/ Euskalerriko mendiak ziran  
gaztain da pagoz beteak,  
baiñan ederki zikindu ditu  
piñuak eta oteak.  
Sufrimentua dakar guretzat  
derriorreko pakeak,  
guk ez daukagu agindutzerik,  
itxi zituzten ateak,  
lenago libre ibiltzen giñan,  
orain dauzkagu kateak.

- 6/ Arbol sanoa eta ederra  
zulatutzen badu arrak,  
azkar asiko zaizka igartzen  
ostuak eta adarrak.  
Euskalerrian au egin zuen  
etorri zan kanpotarrak,  
bertakoaren laguntzarekin,  
etziran aiek bakarrak,  
olaxen asi giñan galdutzen  
emengo oitura zarrak.
- 7/ Amaika neke egiñak gera  
besterentzat on-bearrez,  
beldurtu ere egiten da bat  
entzuten diran gauz txarrez.  
Len aberatsak omen giñaden,  
orain bete gera zorrez,  
geren lurrean besteren morroi  
nagusi jartzeko ordez,  
alai-itxura egiten degu  
baiñan barrutik negarrez.

## **ARITZ BATEN BIZITZA**

Bertso auek jarri nituen aritz-arbol bat banintz bezela.

- 1/ Ni arbol bat naiz sortu nintzana mendian arkaitz onduan, ezkur-ale bat nunbait bizirik an gelditu zan neguan. Udaberria etorri zan da aretxek piztu ninduan, pixkabanaka azi nedien gero urteen buruan.

- 2/ Ezkur artatik muskil txiki bat  
azaldu nintzan aurrena,  
lurrean zaiña itsatsi eta  
gora jo nuen urrena.  
Gorputza gero adar da ostoz  
tapatu zitzaidan dena,  
ta izan nintzan mendi artako  
arbolikan ederrena.
- 3/ Urte askoren buruan baiña  
ni azitzen egunero,  
bitarte artan pasea nintzan  
amaika otz eta bero.  
Jela, elurra ta aize miña  
eta eguzkia gero,  
zer izaten dan badaki batek  
aurrez probatu ezkerro.
- 4/ Nere garaian ni ere asi  
nintzan ezkurra ematen,  
usoak eta ango piztiak  
maitasuna bazidaten.  
Zenbat basurde aundi ta txiki  
an allegatu zan jaten?  
Nere frutuak pizti aientzat  
etziran txarrak izaten.

- 5/ Amaika txori politen kantak  
pozez entzuna nago ta  
txantxangorria egunsentian  
an asiko zan txioka.  
Ark bazekien arbol-zuloan  
nola egoten zan ontza,  
arentzat biak berdiñak ziran  
beroa bezela otza.
- 6/ Ez dakit zenbat urte dituten  
baiñan bai zarra naizela,  
ni ez ninduen aizeak orren  
errez botako bestela.  
Obe luteke an banengoke  
zutik lenago bezela,  
seguru nago ango piztiak  
pena izango dutela.
- 7/ Nere frutua jaten zenduten  
ainbeste uso ta txerrik,  
pena bat daukat: zuek goseak  
utzi bearra bakarrik.  
Nere adarrak igartu ziran,  
ez det emango ezkurrik,  
emen ez baita iñor betiko  
etorritako pizkorrik.

- 8/ Arbol azpian ainbeste pizti,  
nik goitik ezkurra bota,  
jan zezatela nai zuten aiña  
ortarakoxe nago-ta.  
Muxarra ere nere gaiñean  
an ibiltzen zan saltoka,  
sapelaitzak e ni izan nindun  
lo egiten zuen kota.
- 9/ Ni arrapatu ninduen gero  
ezkurrik eman eziñak,  
gorputza untzak tapatu zidan  
ta igartu zaizkit zaiñak.  
Txepetxak ere nere gerrian  
amaika kabi egiñak,  
piztiak izan ziraden nere  
maitalerikan aundiñak.
- 10/ Zer gauza piska geran lur ontan  
ez naiz oroitu izandu,  
—au aize arek len botatako  
arbola zarrak esan du—.  
Sortu nintzaden da gero azi,  
igartu eta usteldu,  
emen gizonik jakintsuenak  
ere ala egiten du.

## **BURDEOS'KO PERIA**

Bertso auek jarri nituen Burdeos'ko peria ikusita, ango makina ta ango azienden edertasuna ta an ikusi genduen faisán bat akordatur.

- 1/ Eder askoa ikusi gendun  
Burdeos ortan peria:  
zezen eta bei, beor da zaldi,  
ardiak eta aria.  
Beste egazti asko ere bai,  
faisán bat arrigarria,  
joaten ziranak ikusitzeko  
nunbaitetik ekarria.



- 2/ Ezta alako egaztirikan  
asko izango munduan,  
bestek esanda nola sinistu  
ikusi ez bagenduan?  
Arrigarria eta aparta  
beste guztien onduan,  
nere lagunak il arteraiño  
izango dute goguan.
- 3/ Jaso zituen txalo guztiak  
ditu ondo mereziak,  
etxerik ez du asko galduko  
azi zuen nagusiak.  
Sari ederrak izan baiditu  
arekin irabaziak,  
bost urte ontan ia Europa'n  
izandutako guziak.
- 4/ Ura zala-ta atera gendun  
bidean amaika kontu,  
danak berari begira eta  
iñor ezin zan aspertu.  
Etzan arraultzen batetik ura  
landare makala sortu,  
beraren jabe dan nagusia  
egon liteke kontentu.

- 5/ Zerbeza lasai edaten zuen  
eta guk bezela jana,  
ez dakit nola azi zan ura  
orrenbesteko faisana.  
Izketan ez du egiten baiña  
entenditzen zuen dana.  
«Oi da gauzaren edertasuna!»  
makiña batek esana.
- 6/ Burdeos ortan nola urtero  
izaten diran periak,  
asko zebiltzan aruntz joanda  
emengo nekazariak,  
ikusten ari ziran gauzakin  
gozaturikan begiak;  
lengo atxur da laiak ez dira  
an zeuden makineriak.
- 7/ Makina ederrik ikusi gendun  
ta gaiñera geron begiz,  
danon Jabeak bear ainbeste  
lurra eman zuen berriz.  
Danentzat jana sortu liteke  
eta gaiñera bi aldiz,  
gaur misilletan gastatzen dana  
ortan gastatuko balitz.

8/ Aurrera goaz gauzetan baiña  
ez gaitezen asko pio,  
egin dan lana gero makinak  
berak kendutzen badio.  
Danak korrika bizi gerade,  
mantsuak ez du balio,  
au etorri da aurrerapenak  
sortu dirala medio.

## ORDUTIK GAURKORA

Bertso auek jarri nituen umetako gauzak gogoratuz, ordutik gaurkora dagoen aldea ikusi eta orretxengatik.

- 1/ Kolkoan alpargatak,  
bidean ankutsik,  
eta gaiñera aiek  
giñunean pozik.  
Guk ez genduen izan  
orain dagon gauzik,  
erotu ere ia  
egin gera kasik.

2/ Gaurkoak ez dabilta  
lengoen antzera:  
kotxean eskolara,  
kotxean etxera,  
jan da jantzi're ondo  
markesen antzera;  
aundi-naiak dakarki  
mundua galtzera.

3/ Amar urte baiño len  
morroi aterata,  
nola ez degu eukiko  
eskolaren falta?  
Duro bat izaten zan  
illeko soldata,  
aurreratuko gendun  
pilla bat galanta.

4/ Egon izandu gera  
zarrari aditzen,  
ta arrazoi dutela  
zaigu iduritzen:  
txikitatik ez bada  
pixka bat sufritzen,  
ura ez da geiago  
gustora bizitzen.

5/ Oiek mundura jai  
baiño lenagotik,  
gu sufritzen oituak  
giñaden gogotik.  
Neronek entzun nuen  
gazte baten aotik:  
«Zuek tontoak izana  
guk ez degu kulpik».

6/ Len mundua beteta  
omen zegon tontoz,  
listo geiegiz baiño  
jatorrago askoz.  
Geiegi aurreraka  
joan geralakoz,  
arroak umiltzeko  
orduak badatoz.

7/ Naiz gutxi nekatu ta  
asko irabazi,  
alare ez da kontentu  
emen iñor bizi.  
Aundi-naia jarrita  
daukagu nagusi,  
ara mundu guzia  
inbiriak josi.

- 8/ Zerbait ere gaitz txarra  
dabilkigu emen,  
sartuta daukaguna  
gizonak barrenen.  
Guk zarrak badakigu  
zer izaten zan len,  
askoz konformeago  
bizitzen giñaden.
- 9/ Jaunak, etorkizuna  
zailla da jakiten,  
orregatik gabiltza  
danok irakiten.  
Lengo tontoak ere  
ori bazekiten:  
emen ez dala jango  
ez bada egiten.
- 10/ Beti oker atera  
egindako ametsak,  
argatik sortzen dana  
ez degu guretzat.  
Emen au datorrela  
iduritutzen zat:  
gutxik egin bear gaur  
alper askorentzat.

## **ELIO BERTSOLARIARI**

Bertso auk jarri nizkion, urte askoan ain lagun izan nuan Inazio Berasarte Elio bertsolariari.

1/ Len alkarrekin ibiltzen giñan,  
gaur bizi gera aparte,  
ez nengon lasai bertso batzuek  
berari ipiñi arte.  
Guregandikan joan ziñala  
badira ogei bat urte,  
bere lagunak gogoan degu  
Inazio Berasarte.



- 2/ Sagarrez betetako etxean  
jaioa zan seme ori,  
trago bat etzion ukatuko  
aruntz joaten zanari.  
Beiak larrean jarri ta bera  
txistuka eta kantari,  
gizarajoak etzion egin  
gaitzik lagun urkoari.
- 3/ Seme jator bat mundu ontara  
sortu zuten gurasuak,  
amaika aldiz alaitua zan  
etxe ondoko basuak.  
Ura il zan da bukatu ziran  
txistuak eta bertsuak,  
Jaunak e nunbait beretzako nai  
ain gizon umoretsuak.
- 4/ Arek dirurik etzuen maite,  
lagun urkoa gogotik,  
orgullo asko etzuen izan  
aundi-naia ta arrotik.  
Jainkotasuna sentitzen zuen  
ta biotzaren barrutik,  
lege zarreko gizon jator bat  
joan zitzaigun mundutik.

- 5/ Gizona dago inbiriak ta  
gorrotoak ondatua,  
baiñan, Elio, zu etziñaden  
izan klase ortakua.  
Esku zabala guztientzako  
eta biotz osokua,  
Euskalerriko lengo guraso  
zar aiek bezelakua.
- 6/ Istripu batez ilda emendik  
eraman zuen Jainkuak,  
gizarajoak egin zituen  
emengo egitekuak.  
Urte askoan izandu giñan  
lagun alkar maitatuak,  
gaur ere pozik artu litezke  
ura zan bezelakuak.
- 7/ Gizarajoa gure naiean  
etzan emendikan juan,  
berdintasunik ez baizenduen  
gizonean da sanuan.  
Guretzat ere urte askorik  
ezta geratzen munduan,  
ea len banatu ginduenak  
berriz bildutzen gaituan.

8/ Leno korrika ibiltzen giñan,  
orain poliki-poliki,  
pixkabanaka zer datorkigun  
ori norberak badaki.  
Laister gerade zure ondoan,  
toki pixka bat eduki,  
Josafateko zelaira arte  
agurtzen zaitut, Iñaki.

## URA ETA ARDOA

Bein taberna batean diskusio bat sortu zan: ardoa zala edaririk onena batzuek, eta beste batzuek ura zala. An entzun genituenak entzun da gero, bertso auek jarri nituen.

- 1/ Onena ura zala batzuek,  
beste batzuek ardua,  
ezerrezetik asi ziran da  
ura zan eskandalua!  
Alkarri antxen esan zioten  
txoroa eta alua,  
pazientziak aituta dago  
gizonarentzat mundua.

- 2/ Ardoak gaixo jartzen gaitula,  
besteak berriz sendatu,  
bai eta ezetz asi ziran da  
etzuten txarra armatu.  
Kontentu egon litezke artan  
ziradenean geratu,  
atera zuten eskandalua  
etzuten errez bukatu.
- 3/ Edaririkan onena zala  
edan ezkeru negurriz,  
ta batek zion: «Neronek ere  
entzun det amaika aldiz».  
Ta beste batek aldamenetik  
au zion erdi-pikardiz:  
«Ardorik ez litzake izango  
urik izango ezpalitz».
- 4/ Batzuei ura gustatzen eta  
besteai ardoa berriz,  
iturria're gauza ona da  
gaudenerako egarriz.  
Aitona batek au esan zuen  
arrazoieta jarriz:  
«Biak dirade gauza ederrak  
edan ezkeru negurriz».

- 5/ Gizon guztiak izate'itugu  
bakoitzak gere oiturak,  
eta errezak dira bukatzen  
guk darabilzkigun dudak.  
Alkolarentzat ez du balio  
sendagillearen kurak,  
oik sendatze'itu Zestoa'n dagon  
balnearioko urak.
- 6/ Negurritikan kanpora oso  
gaitz egiten du edanak,  
ta asko izan uste gabean  
errez pasatzen geranak.  
Alkolak laister egiten ditu  
gizon indartsuen lanak,  
ortik geiegi egindakoan  
erotutzen dira danak.
- 7/ Sano daudenak gaixotu eta  
poltsako diruak kendu,  
gizonarentzat gero negarra  
orretzek ekarritzen du.  
Akordatutzen geranerako  
nola izaten dan berandu,  
ez litzakela ori pasako  
ura edango bagendu.

8/ Nola an jende asko baigeunden  
arrazoi oiek entzuten,  
gure iritzia emango al gendun  
antxen eskatu ziguten.  
Nork bere pentsamentua agertuz  
danak asi erantzuten,  
onena ura izango zala  
garbi erabaki zuten.

## **ORAINGO GAUZAK**

Bertso auek jarri nituen, pixka bat emen gertatzen ari diran gauzetaz oroitzuz.

- 1/ Gai arturikan Ama Euskera  
eta izkuntza maitea,  
zuk danentzako beti zabalik  
biotz onaren atea.  
Maitetasuna bear da emen  
izango bada pakea,  
baiñan beldur naiz ez ote dagon  
dana etsaiez betea.



- 2/ Orrenbesteko aurreratzeak  
egin ditugun orduan,  
gizona gizonaren beldurrez  
ez ote dabil munduan?  
Ez baitu zuzen inork bizi nai  
Jainkoaren aginduan,  
argitu ezin geradelako  
gaude oraindik linbuan.
- 3/ Linbo ortatik ateratzeko  
lege bat dago jarria,  
maite ditzagun izkuntza eta  
sortu ginduen erria.  
Birao zikin bat ere gabea  
ain zera gauza garbia,  
ea betiko billatzen degun  
itzaltzen ez dan argia.
- 4/ Batek gaixotzen dan garaiean  
eskatzen du osasuna,  
erri maitea, au da zuk ere  
lenbailen bear dezuna.  
Oinbeste maite baldin badegu  
Euskadiren ontasuna,  
emen bide bat bakarra dago:  
anaien alkartasuna.

- 5/ Erri au zer dan ondo dakien  
jakintsu batek esan du:  
obe degula argi ibili  
izan ez dedin berandu.  
Ideak utzi alde batera,  
denok Amari lagundu,  
gaitza aguro senda liteke  
ori egingo bagendu.
- 6/ Batek basua autsiko gendun  
eta besteak platera,  
ezjakiñaren gorroto txarrak  
dijoaz gure kaltera.  
Ama gaixoak zer nai lukien  
ematen zaio tankera:  
bakan gabiltzan seme guztiak  
biltzea magal batera.
- 7/ Urte-mordoa izanagatik  
Txirrita zana il zala,  
oraindik ere gogoan daukat  
egiten zigun itzala.  
Bere aotikan entzun nuen bein  
mutil koskorra nintzala:  
politika ta oilloen kota  
biak igualak zirala.

## ZAKUR BATI

Bertso auek jarri nituen, nere anai baten txakurra gai artuta. Izan ere, ain ona zuen. Batek nai ezik utzia ta artua, lagun batek emanda.

Amaika erbi zar ta basurde ta azari arrapatua. Ogei milla duro eskeiñi ta saldu gabe utzia. Istori aundia zuen zakurra.

Mendian galtzen bazan, igual Isaba'n edo Huesca'n, bi egun baiño len etxean azaltzen zan.

Bein, emen basurdea aurrean artu eta Frantzi'ra joan zan. Etxalar'en pasata, frontierari ere etzion kasorik egin. Bere umea an arrapatu zuten, baiña bera etxera etorri zan. Gero, umea ere ekarri zuten.

- 1/ Txakur bat zuen oso maitea  
*Lagun* izena zuana,  
gure etxean azia baiña  
txikitan bestek emana.  
Il zan ezkeroz amaika aldiz  
akordatutzen gerana,  
beste bat pozik artuko nuke  
ark aiña maite nauana.
  
- 2/ Eizera joan da nik nai bezela  
ez baldin bazan ibiltzen,  
jo ere igual egiten gendun,  
ura gaixoa sufritzen.  
Ez dakiena asi ezker  
dakienari agintzen,  
ez da izango oso erreza  
munduan zuzen bizitzen.
  
- 3/ Txakurrak asko ikusi ditut  
baiñan ez orren azkarrik,  
jaio egin zan alakoxea,  
etzuen maisu bearrik.  
Eiztari danak baiño geiago  
zekien berak bakarrik,  
lezio ederrak eman zizkigun  
baiñan guretzat alperrik.

- 4/ Eizeko lanak egin da gero  
etxeratzen giñanean,  
ezur kozkor bat eman da antxen  
lotzen genduen katean.  
Gaba ta egun askatu gabe  
txabola sastar batean,  
gauzak goatzen zaizkigu baiña  
gero, denbora joatean.
- 5/ Txakur azkarren artean beti  
ura izaten zan nagusi,  
nere begien aurrean ez det  
azkarragorik ikusi.  
Jotzen bazan e etzanda jarri,  
etzan joango igesi,  
ain zan umilla, guk ez genduen  
alakorikan merezi.
- 6/ Katean antxen pasako zitun  
arratsa eta eguna,  
alare etzan asarretutzen  
artaraiñoxe zan ona.  
Bear zanean gutxi maitatu  
orain goatzen zaiguna,  
artu liteke arek ainbeste  
maite ginduen laguna.

7/ Bizi zan arte etzan izandu  
bear aiña maitatua,  
amaika erbi zar, azeri eta  
basurde arrapatua.  
Ain zan aparta besteetatik,  
berdiñikan gabekua,  
askotatik bat berezi eta  
sortzen dan oietakua.

8/ Ikusirikan arek eizean  
egiten zekien lana,  
arriturikan gelditutzen zan  
berekin joaten zana.  
An inguruko eiztari zar bat  
amaika aldiz esana:  
gurea zala zakurra baiño  
merezi ez genduana.

## LEN ETA ORAIN

Bertso auek, mendiak eta emengo garai bateko oitura eta izaera gogoratuz jarriak dira; gaitzat orixe artuta.

- 1/ Industririkan etzan garaian guztiok nekazariak, ogibidea eiza ta arrantza, larrean bei ta ardiak. Soroak laiaz jiratzen ziran, egin arto ta gariak, erderaz ere etzekiten len euskaldun bertsolariak.

- 2/ Zertan gabiltzan ez dakigunoi  
barka ezaiguzu, Jauna,  
danen Jabeak egin zituen  
piztiak eta pertsona.  
Berak ematen digu aizea,  
bizia ta osasuna,  
begiak ere bai ikusteko  
munduko edertasuna.
- 3/ Illunak triste jarritzen gaitu,  
argiarekin poztuta,  
oiek ere gu sortu gindunak  
Berak egiñak ditu-ta.  
Baiñan askotan ibiltzen gera  
badanik ere aztuta,  
burua arin daukagunean  
munduko gauzak nastuta.
- 4/ Udaberriak zerbait piztu nau,  
larri nintzaden neguan,  
kirkirrak asi dira egiten  
kabi berriak soruan.  
Arratsetan lo egiten dute  
berena duten txuluan,  
argitutzean kantatutzeko  
eguzkiaren beruan.



- 5/ Jardiñak bezin politak dira  
Euskalerriko mendiak,  
or orfeoi bat osatzen dute  
kirkirrak eta txoriak.  
Alde danetan kantuen otsa,  
zer une zoragarriak,  
denontzat argi egiten dula  
Jaunaren zeru garbiak.
- 6/ Ni ere antxen ibilia naiz  
gaztetan garai batean,  
mendietako aritz ta pago,  
urki ta gaztain artean.  
Urte gutxian auek mudantzak  
emen gure lur maitean,  
batzuentzako onerako ta  
askorentzako kaltean.
- 7/ Zerua urdin jarritakoan  
eguzkiaren argiak,  
soroak lore politez bete  
zituen udaberriak,  
ta gu begira aspertu ezin  
gozatzen geren begiak,  
amaika aldiz egonak giñan  
aitona zana ta biak.

- 8/ Atzerritarrak agindutzea  
emen guretzat kalte da,  
negarrak gero alperrik dira,  
orain kontuak atera.  
Bizirik nai baditugu emen  
oiturak eta izkera,  
diferentziak utzita danok  
bildu gaitezen batera.
- 9/ Oraintxen ia jarri gerade  
bata bestian goardian,  
beste gauz bat zan bizi giñala  
lengo oitura garbian.  
Usaia ere ez da lengoa  
kalean eta mendian,  
ontan bagoaz laister gerade  
inpernuaren erdian.

## ETZAIGU FALTAKO GERRIK

Bertso auek, zerbaiti jarri bear ta alaxe jarriak dira. Askotan, bertsoak jartzen baiño, gaiak billatzen geiago kostatzen baita.

- 1/ Asko ikusten dira aituta  
zituzten pazientziak,  
gero itzaltzen lan ematen du  
su artutzean sasiak.  
Munduan ez lirake egongo  
dauzkagun diferentziak,  
zentzu pixka bat baleukateke  
gizonen kontzientziak.

- 2/ Ederki asko jorratu dute  
bakoitzak bere baratza,  
baiñan ez izan oiek emanda  
jango dezun esperantza.  
Len baiño ere aberatsago  
egin dute aberatsa,  
pobrearentzat laister da emen  
berriz e inpernu latza.
- 3/ Zarrantzako errukitsua  
ibili zuten mingaiña:  
bajuarentzat izango zala  
besteak zeukaten aiña.  
Aztu egiten ordea azkar  
len agindu zuten baiña,  
ematekoa datorrenean  
artzen diote tamaiña.
- 4/ Gauza guztia gora dijoa  
egunetik egunera,  
jaten da jazten zenbat bear dan  
kontuak ondo atera.  
Etxeak berriz igo dituzte  
lau milloitik amarrera,  
gazte maiteak, etzerate, ez,  
sartu mundu ederrera.

- 5/ Oiek gu jarri nai ginduzteke  
  europeoen parera,  
  baiñan soldaten diferentzia  
  utzirik alde batera.  
  Asko duenak ondo jango du,  
  ematen zaio tankera,  
  guretzako zer geldituko dan  
  orain kontuak atera.
- 6/ Danok dakigu zer esan zuten  
  agindu nai zutenean,  
  ta gero aztu zeukaten naia  
  gallendu ziradenean.  
  Agintariak ez badabiltza  
  kristaubide zuzenean,  
  erru guztia inozenteak  
  pagatzen du azkenean.
- 7/ Gauz ontan danok ditugu kulpak,  
  ez beti besteri bota,  
  ta nork berea egin ezkerro  
  zenbaiti gutxi inporta.  
  Betri orrela ibili gabe  
  aserretu ta mikoka,  
  asi gindezke gauzak zuzentzen  
  premi ederra dago-ta.

8/ Emen egintzak bear ditugu,  
ez aginduak bakarrik,  
gogoan daukat nola batean  
idatzi zuen Basarrik.  
Egi galantak jarri zituen  
baiñan ordea alperrik,  
zu pekatari dabillen arte  
etzaigu faltako gerrik.

## ORIA IBAIARI

Bertso auek jarri nituen bein, irurogei eta zortzi urteko gizon zar batekin itzaldi bat egin eta gero. Berak esan zidanez, amaika angula, izoki ta amorrai arrapatzen zuten Oria ibai ortan, eta bai txanpon ederrik artu ere. Orain, ikusi ta negar-gurea ematen omen dio.

- 1/ Iñoiz begira jartzen bazera  
zu Oria'ko ibaira,  
esango dezu: «Lengo angula  
ta amorraiak nun dira?  
Ur garbi artan aiek igari  
gu legorretik begira,  
orain ikusi utsak malkoak  
ekartzen dizkit begira».

- 2/ Gizon zar batek esaten zidan:  
«Gaur ez dauka lengo antza,  
ibai maite au ain zan garbia  
eta arraiz aberatsa.  
Orain besterik ez du botatzen  
usaia eta kiratsa,  
galdu genduen au berriz garbi  
ikusteko esperantza.
- 3/ Naiko angula eta izoki,  
amorra ta beste danak,  
zenbat arroa izango'ituzu  
jendearentzat emanak.  
Nola ez degu izango pena  
artaz oroitzen geranak,  
errio ortan arrapatuta  
saltzen ibili giñanak?
- 4/ Usurbil'dikan bera or daude  
Agiñaga ta Orio,  
amaika txanpon eder artuak  
ibai oi dala medio.  
Gaur ere ez du arrai pin orrek  
saltzeko gutxi balio,  
ta guk ezin jan erostunari  
garesti jotzen baidio.



- 5/ Agiñaga'ko barrio ori  
oriotarren mugan da,  
gu ere antxen ibiltzen giñan  
anguletara juanda.  
Errio ori aberatsa zan  
asko ematen zuan-da,  
amaika aldiz etorri giñan  
debalde naikoa janda.
- 6/ Itxasotikan etortzen ziran  
marearekin batera,  
aitonak laister emango zion  
noiz izango zan tankera.  
Obe genikek gaur e balego  
garai artako aukera,  
orain alperrik joango gera  
arrapatu ta jatera.
- 7/ Ibaiak ez du gaixoak kulpik,  
eskerrak merezi ditu,  
garbi utzitzen zioten arte  
etzuen gutxi partitu.  
Benenez dana erre zuten da  
arrairik ez da gelditu,  
gu zurekin len oitutakoak  
orain nola ez sufritu?

8/ Ez baitute gaur askok pentsatzen  
guk pasatzen degun miñik,  
gaur ikusi ta erro ori  
lenago zer zan jakiñik.  
Oraindik ere jarri ezker  
emen danok bat egiñik,  
ez litzake, ez, or itsatsiko  
belar gaiztoaren zaiñik».

## **UTZI-ALDI BAT EGIN ONDOREN**

Bertso auek, berriz, aspaldian ixil samar egonda zerbait jarri bear, ta alaxe jarriak dira.

- 1/ Utzi-aldi bat eginda berriz  
astera noa idazten,  
bertso-zaleak diran anaiak  
pixka bat poztu ditezen.  
Bolara ontan saiatu gera  
erria gobernatutzen,  
gu nastu-azi gaituzten oiek  
ez dira gutxi poztutzen.

- 2/ Gogoan daukat zer esan zidan  
lagun aundi baten amak:  
«Inbiria ta gorroto txarrak  
emango dizkigu lanak.  
Nork beren faltik ikusten ez ta  
besterenak berriz danak,  
erri au ez du asko altxako  
ori egiten duanak».
- 3/ Danon Jabeak ortxen daukazki  
idatzi eta jarriak,  
gizonarentzat bearrezkoak  
diraden bide garbiak.  
Maitasuna ta errespetua  
galtzen baditu erriak,  
askotan malkoz busti bearrak  
izango ditu begiak.
- 4/ Ikusirikan estu ta larri  
dabilen lagun urkoa,  
zenbaitek ez du alare ematen  
izanagatik naikoa.  
Bear bezela egin dezagun  
Jaunak agindutakoa,  
ondo oroitu gero lur ontan  
etzerala betikoa.

- 5/ Badakizute gizona dala  
danon Jabeak egiña,  
gu salbatzeagatik il zanak  
ipiñi zigun dotriña.  
Ondo betetzen saia gaitezen,  
egin zagun alegiña,  
gero garaia datorrenean  
jaso dezagun ordaiña.
- 6/ Sermoi ederrik entzuten degu  
denak pakearen eske,  
zuzen egiten dituzte gauzak,  
gizarajoak bai uste.  
Ain etorkizun illunarekin  
or daude ainbeste gazte,  
agintariak, etzazutela  
iñor estutu oinbeste.
- 7/ Emen gaiztoa izandakorik  
ez du artuko zeruak,  
Jaunak badaki zein diran emen  
umillak eta arruak.  
Ura ez dute engañatuko  
emengo fariseuak,  
bidean dira geren saria  
jasoko degun orduak.

## JULIAN GAYARRE'RI

Aurreko egun batez, Lasarte'ko zarren ibillaldi bat izan genduen or Ronkal eta Isaba aldera, eta ikusi genduen Gayarre zanaren iduri eder bat; eta uraxe gogoan artu ta alaxe jarriak dira bertso auek.

- 1/ Gayarre sortutako errian  
izandua naiz lenguan,  
bere iduri eder bat ere  
antxen ikusi genduan. .  
Iru aingeru dauzka zaindari,  
gorputza kaja barruan,  
betiko atsedena artutzen  
anai maiteen onduan.

- 2/ Ronkalen jaio zanak artzantza  
izango zuen aurrena,  
geroxeago errerotza ta  
kantore berriz urrena.  
Garai danetan ezagutu dan  
eztarririkan onena  
esaten dute izandu zala  
Gayarre'k izan zuena.
- 3/ Madrid'en boza obetu nairik  
ibili zuten lenbizi,  
diruan falta zegoela ta  
baztarrera zuten utzi.  
Baiñan Iruña'n zeukan maisuak  
alare etzuen etsi,  
ta ari esker gero izan zan  
mundu guziko nagusi.
- 4/ Zer egiten zun ondo zekien  
laguntza egin zizunak,  
arriturikan uzten baizuen  
zenduen maisutasunak.  
Urrutitikan entzuten ziran  
irrintzien oiartzunak,  
berriz e berak kendu zizkizun  
lenago eman zizkizunak.

- 5/ Elur azpian egoten dana  
luzaroetan neguan,  
udaran aize-berritutzen zan  
mendian pago onduan.  
Len esan dedan aingeru ori  
antxen jaioa genduan,  
zenbat sari ta txaloren jabe  
izan ote zan munduan?
- 6/ Mendia zuen bere maitea  
antxen azia zalako,  
aritz, pago ta piñu artean  
irrintzika eta salto.  
Etzuen gozotasun oberik  
gero geiago pasako,  
antxen sortu zan mirari ori  
Norbaitek nai zuelako.
- 7/ Ama onaren bular gozoa  
indarra eman zizuna,  
azkar irrintzi bat egin zuen,  
mendi arek erantzuna.  
Seme argi bat zenduen, Ronkal,  
fama zabaldu dizuna,  
urrutietan ere geroztik  
zerade oso entzuna.



8/ Mirari batez ama onaren  
sabeletikan sortuak,  
aingeru oiek izaten dira  
Jaunak berezitakuak,  
mundu guzian izan ditezen  
gero ondo txalotuak;  
Gayarre asko bear giñuzke  
ura zan bezelakuak.

## BURUTAZIOAK

Bertso auek ere, gai aundirik biltzen ez eta zerbait jarri nai eta alaxe jarritakoak dira.

1/ Ale batzuek jarri nai ditut  
ametsa gogoratuta,  
zerua goian da lurra bean,  
gu erdi ontan burruka.  
Saia gaitezen zuzen ibiltzen  
bizi bakarra degu-ta,  
bide motzean joaten dira  
gorrotoa ta arrunka.

- 2/ Jaunak guretzat egin zituen  
iturri eta ibaiak,  
arbolez betetako mendiak,  
lan egiteko zelaiak.  
Ara zer gauzak sortu zituen  
batzuen jabetu-naiak,  
geroztik alkar iltzen burruka  
emen dabilta anaiak.
- 3/ Ura ta legor mundu au dana  
Jaunak guretzat egiña,  
seme zabarrak gu izatea  
aitak izango du miña.  
Ark bazekien errez emango  
zuela danontzat diña,  
erlea saiatzen dan bezela  
saiatu izan bagiña.
- 4/ Erleak daukan zuzentasunik  
gizonak ez du berdindu,  
aik alperra il egiten dute  
ta guri berriz agindu.  
Erri maite au ez ote zaigu  
orretxengatik samindu?  
Guztiok berdin izan dezagun  
Jaunak mundua egin du.

- 5/ Batzuentzako ase betea  
eta besteak negarrez,  
agintariak, ori zuzentzen  
saia zaitezte meserez.  
Danok dakigu nai izanda're  
eztala izango errez,  
baiñan erriak oi eskatzen du,  
beste gauzarik ezer ez.
- 6/ Berak nai zuten dana egiñez  
etziran gutxi gizendu,  
ase eziñak azkenerako  
gizona berak galtzen du.  
Egi aundi bat bada munduan,  
ura dotriñak jartzen du:  
aundiak oker baldin badabiltz  
txikiak nola zuzendu?
- 7/ Dana garbitik egiten zail da,  
ain dago mundu ustela,  
gauzen jabeak ziranentzako  
zigorra eta kartzela.  
Lapurrak gero elizan zintzo  
onak balira bezela,  
baiñan ez pentsa orrekin Jauna  
engañatuko dutela.

## LEXOTI BERTSOLARIARI

Gure lagun zar bat degun Lexoti gai artuta, eta egin bear dioten omenaldia, bere artzantzako eta dituen esan xebreak gogoratuz jarritako ale batzuk dira auek. Izan ere, gure Lexoti ain alai ibiltzen baita mendian bere aker aundiari eta auntzai kontu egiñez eta bere bertso xebreak kantatuz.

- 1/ Zuk, Jose Luis, bertsolaritza  
landu zenduen lenbizi,  
erretiroa artu ta gero  
artzantzan ziñaden asi.  
Talde ederra osatu're bai  
bere aker eta guzi,  
orrek ez al du artzai onaren  
sari eder bat merezi?

- 2/ Lexoti'k bere maiteak ditu  
lagunak eta bertsoa,  
beti izan da bromazalea  
eta biotzez gozoa.  
San Antonioi errezatutzen  
pasatzen egun osoa,  
andik urruti joan ditezen  
azeria ta otsoa.
- 3/ Txakur bat badu azeri zarrak  
arrapatzen dizkiona,  
berak agindutako guztia  
zintzo egiten diona,  
San Antoniok errezoaren  
sari bialdu ziona,  
izan zezala mendirako ta  
bideko bere laguna.
- 4/ Artzaiak zintzo egiten ditu  
egunero errezoak,  
danon Jabeak izango ditu  
gogoan ondo jasoak.  
Arbol gaiñetik kukuak kuku,  
arek azpitik bertsoak,  
Lexoti'k antxe pasatzen ditu  
ordu ta egun gozoak.

- 5/ Mendiko aize sanoak eta  
eguzkiaren argiak  
alaitzen ditu artzaia eta  
bere auntz eta ardiak.  
Arkaitz tarteko iturritxoak  
noizbait Norbaitek jarriak,  
andik edanda ase zitezen  
beartsuen egarriak.
- 6/ Danok jokatu izan bagendu,  
Lexoti, zure moduan,  
gaur dagon aiña gerra ta inbiri  
etzan egongo munduan.  
Zure nekeak danon Jabeak  
izango ditu goguan,  
egiten zaizun omenaldi au  
ondo merezi zenduan.
- 7/ Askotaz garai sanoagoak  
izandu ziran lenguak,  
aundinaiari josita gabiltz  
inbiriakin galduak.  
Beneno txarrak nola baitauden  
baztarretan zabalduak,  
obe genduke Lexoti asko  
baleuzka gaurko munduak.

8/ Dituen kezka kontatzen jardun  
zitzaidan Lexoti zarra,  
munduak daukan etorkizuna  
ez du ikusten edarra:  
«Ez baididate errezatuko  
aitagure bat bakarra,  
eta ditudan diru guziak  
besteri utzi biarra».



## ERNANI ETA EUSKERA

Bertso auek jarri nituen, len nola izaten giñan gogoratuta: orduko sagardotegi eta umorea, bertso zar eta berriak eta alkartasuna; eta gaurko diferentzia ikusita. Beste mundu bat baizan. Gaur kanpotarrez beteta dago dana, eta lengo sanidade ura falta da.

- 1/ Iru edo lau bertso  
bear dizkat jarri,  
bizia zor diodan  
erri polit orri.  
Iñork ez du joan nai,  
pillaka etorri,  
or dago ispillua  
zer degun Ernani.

- 2/ Nere erri maitea,  
etzaitut aztutzen,  
umetako garaia  
zait gogoratutzen.  
Arrats osoak igual  
ditut pasatutzen,  
oiera joan eta  
zutaz pentsatuzten.
- 3/ Askotan egiten det  
ixilik negarra,  
ain baizaitut maitea,  
jaioterri zarra.  
Izango degu seme  
leialen bearra,  
ez dezatela egin  
gugatikan parra.
- 4/ Bat badegu balio  
duena urria,  
alkate izandua  
Juan Joxe Uria.  
Ura saiatutzen da  
ematen beria,  
alako asko bear  
ditugu ordia.

- 5/ Saia gaitezen danok  
euskera il ez dedin,  
seme danen laguntza  
litzake atsegin.  
Ez jakiteak ditu  
ainbeste utsegin:  
euskaldunak izan da  
erderaz itzezin.
- 6/ Ola ikusten ditut  
beatzitik zazpi,  
beren umetxoairi  
erakusten gaizki.  
Esnatzeko ordua  
izango da noski,  
ez da «euskalduna naiz»  
esatea aski.
- 7/ Orrela guk euskera  
nola aberastu?  
Damakigun jokerak  
zentzurikan eztu.  
Emen au pasa baietz  
egin leike apostu:  
kanpokuak ikasi  
ta etxeoai aztu.

8/ Izkuntza guztietan  
lenengo lorea  
dala esaten dute  
munduan gurea.  
Garbia ta apala,  
biraorik gabea,  
gordetzen dakiena  
Jaunaren legea.

9/ Izkuntza maite duten  
zenbait seme abil,  
bere etsaien kontra  
borrokan badabil.  
Asi zaigu piztutzen,  
egondu zan umil,  
lagun zaiguzu, Jauna,  
ez dezatela il.

## GURASO ZARRAK

Bertso auek jarri nituen, guraso zarrak guri egin zizkiguten laguntzak eta gugatik artu zituzten nekeak oroituz, au baiño geiago ere merezi zutela eta.

- 1/ Guraso zarrak nai ditut jaso osatutzen badet itzik, baiñan ez degu egiten ala ez degulako biotzik. Gugatik dana eman zutenak baztartu eta nai ezik, inpernuan e ez da egongogu ainbesteko Judasik.

- 2/ Guraso batek bere aurtxoa  
maitatzen du biotzetik,  
duen guztia emango dio  
maitasunez jaiotzetik.  
Ta gero danak desprezioa,  
ospitalera etxetik,  
oroitu gabe guretzat ere  
badatorrela atzetik.
- 3/ Lenbizi seme-alabak azi  
ta gero illobatxoak,  
ori egiten ondo zekiten  
orduak amonatuak.  
Lujotan gutxi gastatu zuten  
gure lengo gurasoak,  
erlea baiño zintzoagoak  
nola baiziran gaixoak.
- 4/ Amonak zenbat lagundu zizun  
akordatutzen al zera?  
Zuri onena ematearren  
faltan geldituaz bera.  
Olaxen azi zinduen arek  
aingeru baten antzera,  
erruki gabe zuk baztarrera  
utzi dezuna galtzera.

- 5/ Tristura latza artzen du batek  
gauza auek ikusita,  
maitasuna ta fedea gabiltz  
alde batera utzita.  
Munduan bizi geradelako  
aundinaiaari josita,  
bide okerrak artu ditugu,  
ez amak erakutsita.
- 6/ Jaiotzez aulak eta makalak  
guztiok izaten gera,  
ta gurasoen laguntza bear  
irtengo bada aurrera.  
Arrigarria degu benetan  
geroko gure jarrera:  
geiena maite bear deguna  
uzten degu baztarrera.
- 7/ An izango'ira aita ta ama  
ta azi zindun amona,  
emen utziko ditugu danak  
diruak eta laguna.  
Bukatuko da mundu triste au,  
etorriko da eguna,  
irabazia degun saria  
jaso bearko deguna.

8/ Guraso zarrak erakutsiak  
errezoa ta euskera,  
ez dakit nola zabartu geran  
ain baztarrera uztera.  
Jaunak gu ere baztartu gabe  
guk egin degun antzera,  
lagun zaiogun bizi dedilla  
aitonak zuten izkera.



## **BASERRITAR BATI ENTZUN ONDOREN**

Orain berriro baserritar bat oso asarre sumatu ta alaxe jarriak dira bertso-ale auek. Izan ere, ardi-esnea erdira bajatu diotela, eta pentsua egu-netik egunera gora dijoala, eta ardiak eta danak utzi bearko dituela zion, orrela etzitekeala jarraitu ta.

- 1/ Nekazaritzak emen urterik onenak izan zituan, besterentzako ia erdia nola egin bear baituan. Norbaitek sartu-azi ginduen noizbait Europa Batuan, gu geran baiño pizkorragoak ibili ziran tratuan.

- 2/ Diferentziak aundiak daude  
ta ez da faltako miñik,  
emen batzuek jarriko dira  
egin da bizi eziñik.  
Ez baita iñor lagun urkoa  
maitatutzen degun piñik,  
dirua jarri da Jaungoiko ta  
ez daukagu zer egiñik.
- 3/ Obe dala-ta sartu ginduzten  
gu ere Europa Batuan,  
itz eder asko baiñan egintzak  
falta zaizkigun lekuan.  
Larri zebillen nekazaria  
ez da jarriko altuan,  
denbora izango da testigu  
zer ondorenak dituan.
- 4/ Europatarrak etxe aldera  
egiten dute tratuan,  
eta jakiña aulenak paga  
bear du orrelakuan.  
Besterengatik gutxi ajola  
berea egindakuan,  
emen berriz e pagatuko du  
len zegoenak bajuan.

- 5/ Gu berriz oso pobreak izan  
beste batzuen onduan,  
kanpoko interesaren morroi  
guk jarri bear orduan.  
Zakur aundiak agintzen dute  
Europa eta munduan,  
nai dana berak egiten dute  
eta nai duten moduan.
- 6/ Millaka asko munduan iltzen  
dira urtero goseak,  
armetan berriz gastatzen dira  
millaka milloi paseak.  
Aundiak beti nai dana egin,  
or konpon bitez besteak,  
oiek ez ditu asko estutzen  
beartsuaren eskeak.
- 7/ Lege ederrak munduarentzat  
or daude Jaunak jarriak,  
baiñan gizonak konforme ez ta  
egin zituen berriak.  
Orrekin ez du bentaja asko  
langillea ta erriak,  
ikasi dute mundu zar oni  
nola artu negurriak.

- 8/ Lege gogorak dauzka munduak  
gizonarentzat jarriak,  
kejoso dira arrantzaleak  
ta berdin nekazariak.  
Gora egingo du berriz ere  
bear degun janariak,  
ta azkenean kastigu dana  
pagatuko du erriak.
- 9/ Ase-eziña sortu da emen  
ta kontzientzia galdu,  
mundua ondo jarriko bada  
orrek bukatu bear du.  
Suiza'n dauden gure milloiak  
berriz onera bialdu,  
lapur batzuek ez dezatela  
pobreen ogia saldu.

## TREN TXIKIEN ERIOTZA

Bertso auek, oraingo Urola'ko trena eta len kendu zituztenak gogoan artuta jarriak dira. Izan ere, ainbeste aldiz ibiliak giñan gu aien barrenean, batzuetan Elizondo aldera eta besteetan Lekunberri aldera. Baita Urola'koan ere askotan. Gure garaiak ez baizan orain aiña kotxe.

- 1/ Gizon danak izaten  
ditugu ideak,  
legea dan bezela  
bakoitzak bereak.  
Nik ere azaldu nai  
nituzke nereak,  
moztu dituztelako  
gure trenbideak.

- 2/ Irun da Elizondo  
ibiltzen zan trena,  
orain urte batzuek  
kendu zigutena.  
Amaika kontrabando  
ibili zuena,  
txerri plakoa prankok  
izan zuen pena.
- 3/ Joan da etorri bertan  
egiten genduan,  
Bidasoa-eskiñan,  
Frantzia'ko muan.  
Nunai geldituko zan  
nai zuen orduan,  
makiña bat portuges  
ibili zenduan.
- 4/ Beste bat ere bazan  
Oloki'ko trena,  
amaika ikatz ta egur  
ibili zuena.  
Donostia'n irten da  
Iruña'n azkena,  
Lekunberri aldean  
gogoan dutena.

5/ Orain Urola'koa  
dijoaz kentzera,  
lenago kendutako  
bi oien antzera.  
Ta, langille gaixoak,  
zoazte etxera!  
Au dek alibioa  
pobreak zartzera!

6/ Oso zartu geranak  
laister gera ilko,  
ta gazteentzat lanik  
ez ditek jarriko.  
Estutu bearko da  
amaika gerriko,  
emen gauza onikan  
ez dek etorriko.

7/ Pobreari kentzea  
lana ta jornala,  
ori da egitea  
pekatu mortala.  
Pentsa gu ere tripa  
degunak gerala,  
ta nunbaitetik orrek  
bearko duala.

- 8/ Justu zebillenari  
orain dana kendu,  
gaurko zenbait nagusik  
ala egiten du.  
Larri danak orduan  
txarrera jotzen du,  
obe dezute min au  
lenbailen zuzendu.
- 9/ Ez da entzuten lanik  
eza beste gauzik,  
iru milloitik gora  
dezente ziaztik.  
Eta onek ez dauka  
zuzentzeko trazik,  
urak joan da gero  
ez da bear presik.



## ALKARTU BEARRA

Bertso auek jarri nituen, bein Martzel bertsolariak idatzi zuena letu *Aranzazu*'ko egutegi-orri batetik, egi aundiak esaten zituela, eta uraxe go-goan artuta.

- 1/ Edadez zerbait aurreratuak  
ematen dio tankera,  
etsaia gogor saiatzen dala  
galdu naiean euskera.  
Gaitz au aguro senda liteke  
bildu ezkerro batera,  
apartatuta ibillitzea  
geron buruen kalte da.

- 2/ Garai batean bat izanduak  
gure zazpi probintziak,  
Otaño zanak zion bezela  
oial batetik jantziak.  
Azpi-janean ari zaizkigu  
ta ia gaude etsiak,  
oiek ez ditu asko kupitzen  
mendekoaren antsiak.
- 3/ Amaika egi esanda il zan  
Pedro Maria Otaño,  
askoz geiago zekielako  
iritxi zan ortaraiño.  
Etorri gera emen anaiak  
alkar ondatutzeraiño,  
apartatutzen errezago da  
batera bildutzen baiño.
- 4/ Euskaldunentzat gauza txarra da  
ibiltzea alkar galtzen,  
gure etsaiak au ikusita  
ez dute gutxi gozaten.  
Apartatuta ibilli gabe  
saia gaitezen alkartzen,  
oiek ez dute ezer emango  
gu ez bagera saiatzen.

- 5/ Beti zai daude arrapatzeko  
gure debilidadak,  
baiñan baditu gure erriak  
balio aundiko semeak,  
or España'n dauden jakintsu  
oien inbiri gabeak;  
orregatik bat egin dezagun,  
bestela egin du gureak.
- 6/ Aiek ez dute ezer emango,  
beti zai daude artzeko,  
ta bertan ere billatu leizke  
amaika aien antzeko.  
Pentsatu ondo badegula ordu  
anaiak alkartutzeko,  
bestela gerok aski gerade  
geron erria galtzeko.
- 7/ Geren lurrean guk nai badegu  
itxura-antzean bizi,  
pentsa dezagun danen gaiñetik  
gurea dala lenbizi.  
Bildu gaitezen danok batera  
ta geiago ez berezi,  
bestela morroi izango gera  
eta besteak nagusi.

8/ Emen eskatzen degun guztia  
badakigu zaila dana,  
baiñan pentsatu bear genduke  
ia garaia badana.  
Lutoz jantzita ibilli gabe  
oinbeste aita ta ama,  
tiroka ez degu ezer egingo,  
alkartuta berriz dana.

## LENGO AITONAK

Ernani'n badegu baillara bat Portu deitzen dioguna, eta antxe biltzen giñan lengo aiton aiekin. Izan ere, ain bertso-zaleak ziran, eta gaiñera berak ere bastante egiten zutenak. Txirrita zanarekin San Juan eskean urtero ibiltzen ziranak. Bromoso utsak eta gizon galantak. Batez beste, euna kilotik gorakoak, eta aundi ainbeste ontzi. Danak lege zarreko aitonak, gaurko drogazaleen antzik gabeak. Aiek aitonak, aiek! Gaur falta ditugunak.

Grazianok Otaño ere ezagutu zuen. Baita bertan ikusi ere, Ernani'ko Karabel'go tabernan gure aitonarekin. Eta Grazianori aditu nion, bein Amerika'tik etorri ta nola aritu ziran bertan. Orain dana ez naiz gogoratzen. Baiñan Otaño'k, saioa egin da, azkeneko bertsoa onela kantatu omen zuen:

Errera'ko ondoan  
antxe dago Pasai,  
aurrak eta emaztea  
an daduzkat nik zai,  
beste egun batian  
kantako deu lasai.

Ori kantatu ta partitu omen zan.

\* \* \*

1/ Lengoan egon nintzan  
Portu'ra begira,  
gaztetan ibillitzen  
giñaden tokira,  
galdetuaz: «Orduko  
aitonak nun dira?»  
Joan ziran emendikan  
oso urrutira.

2/ Graziano zarra ta  
Joan Jose Andola  
goratuko nituzke  
banekike nola.  
Iduritzen zait beren  
ondoan nagola,  
ezin baititut aztu  
nik aiek iñola.

- 3/ Bat izaten zan beti  
kuadrillako buru,  
an alkartuko ziran  
lau aiton inguru.  
Aiekin alkartzean  
bertsoak seguru,  
*Makala* aterea  
makiña bat orru.
- 4/ Jerolimo *Makala*  
zalarik burua,  
ura zan pakea ta  
ura zan zerua.  
Gaur ere artu leike  
alako girua,  
bañan mudatu zaigu  
ederki mundua.
- 5/ *Maldaburu* ere etzan  
izan lagun txarra,  
gaur badago alako  
batzuen bearra.  
Bertsoa ta txistea,  
broma eta parra,  
ura zan Euskadi'ko  
lengo lege zarra.

- 6/ Ia etxero bazan  
sagardotegia,  
bakallo errea ta  
etxeko ogia.  
Berriz noiz ezagutu  
ain mundu garbia?  
Parra egiten ere  
aztu zaigu ia.
- 7/ Ernani'ko Portua'n  
Sanghai'ko taberna,  
ta nagusia Jose  
izena zuena.  
Antxen bilduko ziran  
aiton jende dena,  
erriak eman zuen  
jenderik onena.
- 8/ Arratsaldea pasa  
nola edo ala,  
etzuten osatutzen  
laukote makala.  
Nik uste det zeruan  
sartuko zirala,  
ta an ere kantari  
ariko dirala.



## TXAKUR BATI

Ni jaio nintzan baserritik bertan, badago beste etxe bat, Lastaola deitzen zaiona. An bazan gizon aundi bat, Joan Martin deitzen geniona, Kuba'ko gerran ibilia, eta aretxek ekarria zakur ori. Baiñan bai aundia eta pizkorra. An arrimatzen ziran txakur koskorrak, arek astintzen zituen ederki. Baita borroka asi ta ito ere. Aren ortzetatik iges egiten zuenik, etzan geiago arrimatzen, da ala obe. Uraxe gogoratuta jarriak dira bertso auek.

- 1/ Txakur bat e bazuen,  
izena *Il-arte*,  
zenbat borrokalditan  
artu zuen parte?  
Arekin asten zanak  
beretzako kalte,  
obe zuen ibili  
al bazan aparte.

- 2/ Oso ona izandu  
zuten etxerako,  
etzan ibiltzen nagu-  
sian kalterako.  
Arek eltzen ziona  
etzan aterako,  
eskarmentatuko zan  
beste baterako.
- 3/ Zaldi bat aiña bazan  
kateari tiran,  
etzan giro izaten  
aren etxe-jiran.  
Arrimatzen zanari  
ark kozka segiran,  
ijitoak e larri  
ibiltzen ziran.
- 4/ Arek lapur koskorak  
zitun gorrotuan,  
nundik nora zebiltzan  
uraxe kontuan.  
Arrapatu ezkeru  
gustoko lekuan,  
bere partetik danak  
itoko zituan.

- 5/ Zartu ta bukatu zan  
*Il-arte* gaixua,  
gorputzez aundia zan  
eta indartsua.  
Arrigarria berriz  
beraren zentzua,  
zakutik jaten baizun  
idien pentsua.
- 6/ Txakurra nagusiak  
maite izan zuan,  
etzan aurrera joango  
jarritako muan.  
Baiñan agintzen zuen  
bere terrenuan,  
obe zan guk e ala  
egin bagenduan.
- 7/ Baserri aundi artan,  
illunduta ere,  
ateak zabalikan  
egoten dirade.  
Ez da iñor sartuko  
ark sentitu gabe,  
erne ibili leike,  
beretzako obe.

- 8/ Egunez lotuta ta  
libre arratsetan,  
erne ibiliko da  
etxeko mugetan.  
Nagusiak alaxe  
oitua gaztetan,  
ez dakit nola etzun  
ikasi izketan.
- 9/ Aundia ta pizkorra,  
asko ikasia,  
aretxek egiten zun  
ango justizia.  
Aren gain egoten zan  
baserri guzia,  
lasai oieratzen zan  
bere nagusia.
- 10/ Ari bai etziola  
iñork egin parrik,  
eskeiñitzen zioten  
txorizo ederrik.  
Etzuen jango gerta  
etzedin okerrik,  
jan egingo zun baiña  
etxean bakarrik.

11/ Nagusian esana  
egingo zun zuzen,  
baiñan konpiantzikan  
etzuen artutzen.  
Gero asi zanean  
piska bat zartutzen,  
batekin besterikan  
etzan piatutzen.

12/ Arekin guk pasatzen  
genitun larriak,  
etzuen ikaratzen  
jota're arriak.  
Orra amabi bertso  
oraingo berriak,  
txakur bati Ernani  
Txikiak jarriak.

## ISRAEL TA ARABEAK

Bertso auk jarri nituen lengo batean, telebisioari begira nengoela, an ikusi nituen salbajadak ikusita. Kristauaren izena daramagun animalia asko gaude oraindik.

- 1/ Lengoan ikusi det  
telebisioan  
Israel ez dagola  
bere juizioan,  
orain egin berria  
duten azioan,  
arabeak bizitzen  
diran nazioan.

- 2/ Au ere ikusi da  
aurtengo urtean,  
Israel eta arabe  
orien artean.  
Ura aien lurra da  
ta utzi pakean,  
berak gaitzik egiten  
ez duten artean.
- 3/ An bizi diran seme  
urrikalgarriak,  
lege oiek ez dira  
Jainkoak jarriak.  
Besoak txikitutzen  
jasota arriak,  
biotzikan ez duten  
borrero berriak.
- 4/ Aien lurrak ziranak  
berentzako artu,  
gero ume gaixoen  
besoak apurtu.  
Ori ezin lezake  
munduak barkatu,  
bestela ez da emen  
justizirik sortu.

- 5/ Israel orrek danak  
beretzat nai ditu,  
nunbait bere lurretan  
ezin da kabitu.  
Etzazula odolez  
lurrikan gorritu.  
obe dezu etxeko  
mugetan gelditu.
- 6/ Armaren mende jarri  
naiean auzia,  
judioa, etziñan  
oraintxen asia.  
Baiñan bukatu leike  
zure pantasia,  
beti ez dezu egingo  
nai dezun guzia.
- 7/ Ikusteko jaioak  
dirade bereak,  
miru gaiztoen mende  
dauden arabeak.  
Ez baditu zuzentzen  
guztion Jabeak,  
oiek ez dira gero  
izango obeak.



- 8/ Israel'en jokerak  
ez gaitu poztutzen,  
oiek ez dute iñor  
errespetatutzen.  
Beti sesio billa  
bartzarrak nastutzen,  
oiek Jesukristo're  
olaxen il zuten.
- 9/ Mundua egin zuenak  
jarri zun legea,  
gaur dagoena baiña  
askotaz ohea:  
errespetatutzeko  
bakoitzak berea;  
ala bear litzake,  
ez egin ordea.

## KANADA'KO BASO-MUTIL BATEK ESANAK

Bertso auek, urte askoan Kanada'n basoan lana egin duen bati jarriak dira, bere naia betetzeko. An otz gogorak pasa omen zituen, eta beroak ere bai. Baiña ez omen dauka damurik. An andre aberatsa artu baizuen. Eta berak aurreratuta zeukana-rekin, orain bapo bizi da, bere emaztea ta bi seme-txoren ondoan, nai duenean etorri ta joan egiñez.

- 1/ Kanada'n bizitu dan batekin  
egin ditut itz batzuak,  
ogei urtean mendian lana  
egin du gizarajuak.  
Ikustekoak omen dirade  
ango arbol da basuak,  
ta esan zidan: «Arixere ere  
jarri beaizkak bertsuak».

- 2/ Arrigarriak omen dirade  
arek dituen mendiak,  
eta arbolak sinistu ezin  
litezken bezin garbiak.  
Berez sortu ta azitakoak,  
ez aldatuta jarriak,  
orregatikan ditu Kanada'k  
aberastasun aundiak.
- 3/ Esan zizkidan izen-mordo bat  
baiñan aztuta dauzkat nik,  
emen arbolik ez omen dago  
ain luze eta zuzenik.  
Zer balioak dauzkan Kanada'k  
egur utsetan bakarrik,  
ez omen dago negurtzerikan  
ango aberastasunik.
- 4/ Joan baiño len emen oitua  
nola baizegon basuan,  
gero an ere lengo lan-klase  
berean jarraitu zuan.  
Urte askoan besteren mende  
ogia jango bazuan,  
bi klasetara oituta dago:  
gazian eta gozuan.

- 5/ «Kanada'gatik ez dakat ezer  
gaizki esaterikan nik,  
sasoi nuela joan nintzan da  
ez daukat batere penik.  
Lana egiten duenarentzat  
an ez da faltatzen janik,  
baiñan alperrak ez pentsa an e  
ondo ibiltzen diranik».
- 6/ Beste gauza bat arritzekoa  
angoazienda-pillak,  
artzai zintzoak nai dituzte an:  
Euskalerriko mutillak.  
Txanpon batzuek egin da gero  
baldin badira abillak,  
andretarako billa litezke  
diru duten neskatillak.
- 7/ Paraje ura aberatsa da,  
ango soro ta basuak!  
Nunai ikusten omen dituzte  
basurde eta otsuak.  
Egunez kendu ta arratsetan  
berriro jarri lazuak,  
ta arrapatu ere egiten  
omen zituzten batzuak.

8/ «Basauntzak berriz ikusten ziran  
konta ezin leizken diña,  
eizetik errez arrapatzen zan  
urte guziko zeziña.  
An eskasikan etzan izaten,  
beti nai genduen aiña,  
konpuestorik gabe azia,  
mendiko janari piña».

9/ Len brusarekin ibiltzen zanak  
gaur mudatu du jazkera,  
orain mundua ikusten dabil  
alde batetik bestera.  
Udaran onuntz etorritzen da,  
neguan aruntz ostera,  
inglesez ere ikasi du ta  
etzaio aztu euskera.

## EMENGO EGOERA

Bertso-ale auk, zerbait jarri bear da alaxe jarriak dira, emengo egoera pixka bat ikusita.

- 1/ Maisu aundi bat izandu nuen  
lendabiziko gidari,  
arixe esker jarraitu diot  
egiten deten lanari.  
Zor au pagatu naia badaukat  
merezia duenari,  
nere begiak lenengo argia  
ikusit zuten lurrari.

- 2/ Lengo batean esan zizkidan  
urte asko dituenak,  
nola ikusi dituen ia  
munduko baztar geienak.  
Beti onera etorri naian  
emengoak geradenak,  
baiñan emendik ez du joan nai  
kanpotikan datorrenak.
- 3/ Emen dauzkagun kanpotar oiek  
ezin gaituzte ikusi,  
ta indioak bezelaxe nai  
gaituzte bialdu igesi.  
Baiñan pentsatu bear luteke  
gu geradela lenbizi,  
ta orregatik nai degula izan  
geren lurreko nagusi.
- 4/ Ondo dakite gu geradela  
emen bertako arraza,  
baiñan arpegi beti ematen  
ez daukagu lan erraza.  
Gaur ere gogor zanpatzen dute,  
lengoak paseak pasa,  
ito naiean dabilta baiñan  
artuko degu arnasa.

- 5/ Ardi-larrua jantzita dabil  
ito nai gaitun otsua,  
gaiñera desapio egiñez  
laister degula plazua.  
Zergatikan il nai zaituzte zu,  
gure euskera gaixua?  
Zeruan dago zuri bizia  
gordeko dizun Maisua.
- 6/ Pake-zalea ez da ibiltzen  
iñori ematen gerrik,  
amaika odol lenago ere  
ixuri zuen Euskadi'k.  
Euskera galdu nai zuten baiñan  
ordea alper-alperrik,  
etsaiak ez du menderatuko  
Ama onaren indarrik.
- 7/ Aspalditikan emanda geunden  
zer etorriko zan traza,  
oitura zarrak beti gordetzen  
ez da izango erraza.  
Baiñan guk zintzo gorde ditzagun  
degun artean arnasa,  
etxe askotan sartu da emen  
kanpotar oien arraza.



8/ Gu baiño zuzenagoak ziran  
lenagoko gurasuak,  
otorduan da oerakoan  
amonaren errezuak.  
Atzeratuak omen giñan len,  
gaur daude aurreratuak,  
leku onera joan zaizkigu  
gure oitura zintzuak.

## ROBOTAK

- 1/ Robotak dira gizonen lanak  
gaur egiten dituztenak,  
ta gizon asko lanikan gabe  
or uzten dizkigutenak.  
Oso azkarrak izango ziran  
oiek sortu zituztenak,  
berekin datoz pozak ondoren  
ekartzen dituen penak.
  
- 2/ Gizona asko argitu dala  
mundua aurreratutzen,  
zenbat bentaja dituen arek  
jarri zaitez pentsatutzen.  
Lasaitasunik ez du ekarri,  
dana dijoa estutzen,  
ta erri baten etorkizuna  
ez da orrekin poztutzen.

- 3/ Gaurko munduan bearrezkoa  
omen da makinaria,  
gaur orren kontra ez gaude iñor,  
aitortzen degu egia.  
Baiñan robotak jaten badute  
langillearen ogia,  
mundu triste au ikusitzeko  
dago ixtillu gorria.
- 4/ Aurki gizonik ez da bearko  
mundu ontan lanerako,  
sortu dedilla aurrerapena  
baiñan danen onerako.  
Asko duenak egiten badu  
berriz ere etxerako,  
makina ederrak izan litezke  
gizonaren kalterako.
- 5/ Dana batzuek jan bearrean  
igarrak eta ezeak,  
ez ote dabiltz gauza askotan  
negurritikan paseak?  
Naiz ondo jakin nola milloiak  
iltzen dituen goseak,  
alaxen ere errukirikan  
ez duten kristau-klaseak.

- 6/ Gaurko gizona aurreratu da,  
eskola-faltik ez dago,  
ta zenbat eta geiago jakin  
orduan da estuago.  
Eskolik gabe bizitu giñan  
orain baiño lasaiago,  
aurreratzea au baldin bada  
obeto geunden lenago.
- 7/ Zientziaren aurrerapena  
negurritikan pasea,  
len bezelaxe dago munduan  
gizonen ezin ase.  
Batzuentzako dana bilduta  
askorentzako gosea,  
aurreratze au ez da izandu  
guk bear degun klasea.
- 8/ Politikoak ere or dabiltz  
asarre alkarren kontra,  
ta nork berea egindakoan  
besteak gutxi inporta.  
Bizimodua txartutzen bada  
aurrera geiegi jota,  
orduan alper-alperrik dira  
eskola eta robotak.

## KATU ZAR BATI

Bertso auek etxean izan genduen katu zar bati jarriak dira. Izan ere, oiek eta geiago merezi zituen animalia zan. Amaika xagu eta arratoi arrapatua zan, baiñan bera ere arrapatu zuen norbaitek.

- 1/ Gure etxean amaika  
aldiz aitatua,  
ezagututzen degu  
ura faltatua.  
Aitonak izan zuen  
oso maitatua,  
satorrak arrapatzen  
zekien katuā.

- 2/ Ark bazekien nola  
ibili basuan,  
illundu ordurako  
an nunbait auzuan.  
Katu emerren batek  
engañatu zuan,  
edo eroriko zan  
etsaien lazuan.
- 3/ Pizkorragorik iñork  
ezagutu al du?  
Diruagatik berriz  
etziteken saldu.  
Ez dakigu il egin  
zuten ala galdu,  
beintzat etzan geiago  
etxean azaldu.
- 4/ Berriz olakorikan  
ez degu sortuko,  
gogoan degu danak,  
etzaigu aztuko.  
Aitonak esaten zun:  
«Ez dek azalduko.  
Zikiratu bagendu  
ez uken galduko».

- 5/ Katu indartsua zan,  
aundi ta gizena,  
izugarrizko bibo-  
teak zituena.  
Beti egiten zuen  
berak nai zuena,  
*Stalin* jarri zion  
amonak izena.
- 6/ Katu asko jakiña,  
errespetokua,  
ez dakigu eskertzen  
aren meritua.  
Amaika sube zar ta  
sator garbitua,  
aitonak ditu penak  
ura faltatua.
- 7/ Guk alako katurik  
ez degu ikusi,  
ango sagu guziak  
jan zitun lenbizi.  
Arratoi zarrak laister  
juan ziran igesi,  
ta gaiñera bearko  
nai bazuten bizi.

- 8/ Ura zan ango katu  
danen nagusia,  
etxean jaioa ta  
mendian azia.  
Arek egiten zuen  
ango justizia,  
amaika txori gaixok  
utzi zun bizia.
- 9/ Galdu egin zitzaigun  
ez dakigu nola,  
ez gendun aztarrenik  
atera iñola.  
Ikusirikan arren  
gizena zegola,  
norbaitek jan bazuen  
on egin deiola.



## EUROPA BATUA

- 1/ Danon artean egin nai dute  
orain Europa bakarra,  
ez ote dago ortantxen ere  
ondo pentsatu bearra?  
Onenak berak jango dituzte,  
an geldituko da txarra,  
pozaren billa joan da ea  
ekartzen degun negarra.
  
- 2/ Bentaja aundiak omen ditugu  
Europa'n sartu ezkerro,  
denbora izango da testigu,  
ikusiko degu gero.  
Guk berriz ere lan egin bear  
eta angoak listero,  
nundik geiena bilduko duten  
badakite onezkero.

- 3/ Mesedegarri izango dala  
batzuek ala diote,  
beste batzuek ezin sinistu  
ordea ikusi arte.  
Lenago baju bizi diranak  
pagatu bear badute,  
jeneralean orain artean  
ala egin izan dute.
- 4/ Gure larriak ez ditu asko  
estutzen agintariak,  
gu kezkatu bizi gerade,  
auek dira komeriak!  
Emen legeak jartzen dituzte  
nai dutenean berriak,  
geren buruak oietxen morroi  
laister ditugu jarriak.
- 5/ Gure semeak aruntz soldadu  
eta angoak onera,  
leno nastuak gaudela baiña  
kastaz mudatuko gera.  
Gure arraza zikindutzea  
ez al dakarte onera?  
Bide ortatik nora goazen  
ematen zaio tankera.

- 6/ Olaxen ibiliko gaituzte  
alde batetik bestera,  
garbitasuna zikinduko da,  
arrazak nastuko gera.  
Gure aitonen oitura onak  
badijoazte galtzera,  
erruki zaitut, bertsolariak  
maite zaituzten izkera.
- 7/ Gu baiño aberatsago dira  
len dauzkagun nagusiak,  
guri on egiteagatikan  
ote ziraden asiak?  
Ez ote daude oiek tratuan  
oso ondo ikasiak,  
gero berentzat izatearren  
gure ondasun guziak?
- 8/ Europa zar au bat egingo da  
emen polleki-polleki,  
gu gero ere besteren mende  
jarraituko degu beti.  
Zakur aundia ez da izango  
mendekoaren erruki,  
ark kozka nundik egin bear dan  
guk baiño geiago daki.

## IPARRALDEKO SENIDEAK

- 1/ Bidasoa'ren arunztik dauden  
gure senide garbiak,  
baserri txuri, soro berdeak  
eta larrean ardiak.  
Berdin gabeko garbitasuna  
dute ango baserriak,  
ta ni begira aspertu ezin  
gozatzen nere begiak.
  
- 2/ Jakiñikan bat izan giñala  
eta gaudela aparte,  
nik galdetzen det gu ontaratzen  
zeiñek artu zuen parte.  
Geroztik onuntz ditugu mugak  
ta dauzkagun aiña kate,  
larri ziran, bai, zeru txiki au  
bi pusketan jarri arte.

- 3/ Beti entzun det Euskalerra au  
fameli bakarra dala,  
ta berak ere badakite, bai,  
jatorriz ala gerala.  
Eta orduan gure oiturak  
errespetatu ditzala,  
ez beti izan erri onentzat  
olako biotz zitala.
- 4/ Txarrak gerala baiña berentzat  
gustora artu ginduzten,  
nunbait aientzat onak izango  
ziraden gauzak ikusten.  
Txakurrak ere ez du ezurra  
artzean nolanaï uzten,  
biak igualak dirala oiek  
ari dira erakusten.
- 5/ Gure arrebak omen dirade  
Paris'ko neskame danak,  
aiek egiten omen dituzte  
ango aberatsen lanak,  
len bizi ziran zeru ontatik  
ango inpernura joanak,  
emen utzirik jaiotetxea,  
senide, aita ta amak.



- 6/ Paris frantzesen kapitala da  
baiñan ez gustagarria,  
an eguzkirik ez da artutzen  
ta falta aize garbia.  
Sano zegona an gaixotzen da,  
ala nago igarria,  
emen mendia degu guretzat  
leku osasungarria.
- 7/ Oitura onak bazekizkien  
gurasoairi ikasik,  
baiñan aruntza joan zanean  
aztu zitzaizkion guzik.  
An ez da falta aingeru oiek  
engañatzeko Judasik,  
asko maiteko zaituzte baiño  
laister zerade nai ezik.
- 8/ Aita ta amari gogor egin da  
gaixoak geroztik lan du:  
«Eskarmentuan orain sartu naiz  
baiñan ordea berandu.  
Aitortutzen det nik ez nituen  
guraso txarrak izandu,  
aien esanik ez egiteak  
ninduen betiko galdu.

9/ Aita ta amak maitasun dana  
emanetz giñan aziak,  
bide txarreko tentazioak  
jarri ginduen nasiak.  
Zertako dira lujak eta  
Paris'ko irabaziak,  
bere eskutik uzten bagaitu  
Jaungoikoaren graziak».

## NEGOZIO BERRIA

Bertso auek jarri ditut, orain dala denbora gutxi, radiotik Alemani'ko kontu batzuk entzun da gero: an aurrakin zer negozio egiten dituzten. Alaxe, ura gogoratuta jarriak dira.

- 1/ Alemania'n gertatu dana radiotik adituta, egia dala diote baiña nago ezin sinistuta. Negozio ona omen daukate granujak alkar artuta, naiko dirua irabazteko besteren aurrak salduta.



- 2/ Radiotikan ikasi ditut  
Alemani'ko berriak:  
etxe apartak omen dauzkate  
orretarako jarriak,  
eta neskatxak aurretarako  
nunbaitetik ekarriak.  
Oraindik ere bizi dirade  
Hitler'en animaliak.
- 3/ Txit bereziak omen dauzkate  
orretarako artuak,  
kristau bizien tratalariaik,  
deabru amorratuak.  
Kondenatzeko bildurrik gabe  
zikinkerian sartuak,  
nola lezake au ametitu  
erri zibilizatuak?
- 4/ Indiziotik sortzen dituzte  
nai duten aziarekin,  
denbora askoan ibilliko du  
ama gaixoak berekin.  
Gero mundura etorriko da  
bear dan denborarekin,  
amak bularra emango dio,  
aita zein duen ez jakin.

- 5/ Nazio oiek aurreratuta  
daudela oso diote,  
kristau fedea galdu zuten da  
au ere sortu digute.  
Gure aurreko guraso zarrak  
ori aditu balute,  
beste gaitzikan etzuten bear,  
ilko ziran derrepente.
- 6/ Lengo batean radiotikan  
etxean nik entzun nuan,  
nola aurtxoak saltzen dituzten  
txerrikumeen moduan.  
Edozer gauza libre dago gaur  
lotsa galdu dan munduan,  
lengoak lengo, jaunak, au ere  
aditu bear genduan!
- 7/ Au egitera iritxi dira  
daukagun mundu nasian,  
ez baidaukate sinismenikan  
Jaungoikoaren grazian.  
Jaiotzen danak agindutzerik  
ez dauka bere bizian,  
asiera or eman dute ta  
laister da mundu guzian.

8/ Goitik begira an egongo da  
guztiona dan Artzaia,  
sei egun dauzka lanerako ta  
santifikatzeko jaia.  
Alare batzuk izaten dute  
dana arrapatu naia,  
or ikusten da dirua dala  
mundu ontako etsaia.

## **BISTAN DAUZKAGUN MIRARIAK**

- 1/ Arantzazu'ko Ama maitea,  
eskean nator Zugana,  
beti entzun det artzai gaixoen  
Zaindari izan zerana.  
Eta ni ere nola bainaizen  
gaztetan artzai izana,  
lagun zaidazu ondo egiten  
asita daukaten lana.
  
- 2/ Bizi-lekua borda txiki bat  
eta lagunak ardiak,  
poztutzen nindun txorien kantak  
ta eguzkiaren argiak.  
Soroan zizak biltzen nituen  
sortuak udaberriak,  
nola etzaizkit gogoratuko  
ango oitura garbiak?

- 3/ Ni berriz ere antxen biziko  
nintzaden, bai, onezkero,  
egin ditudan amets gozoak  
egi biurtu ezkeru.  
Gazte denboraz akordatzen naiz  
orain zartu eta gero,  
mendia dala gure zerua  
pentsatzen det egunero.
- 4/ Oroi gaitezen zenbat lezaken  
guztiona dan Jabeak,  
zenbat zorion ote ditugun  
asko eskertu gabeak:  
gabeko intzak egunsentian  
sortzen dituen loreak,  
gure mendien apaingarriz  
lurretikan atereak.
- 5/ Negua eta udaberria  
Norbaitek egin zituan,  
ori mirari aundi bat dala  
izan dezagun kontuan.  
Larrak lora ta arantzaz bete,  
usai gozoa kanpuan,  
ea oraingo zein jakintsuek  
oiek egiten dituan.

- 6/ Geren begien bistan dauzkagu  
guk miraririk aundiñak,  
egindakoak gaurko gizonak  
baiño geiago zekiñak.  
Ta aintzakotzat ez ditu artzen  
eskertutzen ez dakiñak,  
aien ondoan piska dirade  
oraingo asko-jakiñak.
- 7/ Gauz oiek danak ikasi gindun,  
gero joan giñan zabartzen,  
egi galantak bistan dauzkagu  
ta ez ditugu eskertzen.  
Gezur-maitale biurtutzean  
egirik ez da maitatzen,  
pentsa dezagun mundua ez dala  
ilda bakarrik bukatzen.
- 8/ Gaixotutzean Jaunari eske  
emateko osasuna,  
il bear orrek danon barruan  
sortzen du estuasuna.  
Juez bat ere an izango da  
zorrotz artuko gaituna,  
merezi degun sariarekin  
an pagatuko diguna.

9/ Emen daukagun ase-eziñak  
geroko danak alperrik,  
zuzentasuna eskatuko du,  
Arek etzuen nai gerrik,  
ez baizegoen anaiak alkar  
iltzen ibilli bearrik.  
Diruak eta politikak an  
ez du izango indarrik.

## **NERE BURUARI**

- 1/ Gaztea izan nintzan  
baiñan orain zartu,  
ondu egin bearrean  
jenioa txartu.  
Burua zuritu ta  
gerria gogortu,  
ez det aspaldi ontan  
asko aurreratu.
  
- 2/ Zartzea da sendatu  
ez liteken miña,  
orrek txikitutzen du  
gizonik aundiña.  
Orain naiko txuleta  
badaukagu baiña,  
alare ez naiz leno  
aza janda aiña.



- 3/ Txori-kabien billa,  
saltoka jostatzen,  
orduan ez giñaden  
askorik nekatzen.  
Garai artan ez gendun  
orrela pentsatzen,  
ara uste gabean  
nola dan etortzen.
- 4/ Ez giñan nekatutzen  
igotzen mendira,  
errez joaten giñan  
nai gendun tokira.  
Salto egin da igual  
aidean bi jira,  
orain ementxe nago  
besteai begira.
- 5/ Len ibiltzen giñanak  
salto eta dantza,  
uste gabe asi naiz  
egiten balantza.  
Ondo ibilitzeko  
au dek esperantza,  
eserita jartzean  
ezin gaituk altza.

- 6/ Etzanda jartzen banaiz  
gero nork mugitu?  
Belarritikan ere  
ezin det aditu.  
Bista're bajatu ta  
ajeak berritu,  
demoniño gaiztoak  
arrapatu gaitu.
- 7/ Gabez igual parranda  
ta egunez lanean,  
asko nekatu gabe  
sasoia zanean.  
Beti ibiltzen giñan  
umore onean,  
eziña etorri da  
zartu geranean.
- 8/ Guk ere len ez gendun  
sasoia ren palta,  
orain leno bezela  
ezin degu salta.  
Desgastea ta reuma,  
kojua galanta,  
arpegia zimurra,  
au degu au planta!

9/ Lagunikan onena  
andrea orduan,  
naiz beti ez ibilli  
beraren onduan.  
Aren esanak zintzo  
egin baginduan,  
geren buruarentzat  
obeko genduan.

## ASE EZIÑAK

Auek, berriz, lana ta lana ta dirua egin ta egin ta asetzen ez diran batzuei jarriak dira.

- 1/ Goierriko aitona,  
txit langille piña,  
aitzurrez makiña bat  
luberri egiña.  
Lana egitea zan  
bere atsegiña,  
ta orain gerrietan  
omen dauka miña.
- 2/ Lana zer zan gazterik  
ondo proatua.  
amaika sasi badu  
soro biurtua.  
Errez ezagutzen da  
gizon nekatua,  
oso zartu baiño len  
dago okertua.

- 3/ Zintzoak izateko  
aitak eta amak,  
ondo egin zituzten  
gurason esanak.  
Geroko ametsetan  
bazituzten planak,  
baiñan oker atera  
zitzaizkaten danak.
- 4/ Gizona Antonio,  
emaztea Lutxi,  
aiek aitzurrik gabe  
ezin zuten etsi.  
Lana beti gaiñezka,  
alimentu gutxi,  
ta orain diru danak  
besterentzat utzi.
- 5/ Urteak ere asko  
zituzten paseak,  
etxean naiko jana  
ta erdi goseak.  
Jaio egiten dira  
olako klaseak,  
orain illobak dabiltz  
ederki aseak.

- 6/ Lana egiten dunak  
bear baiño geio,  
dirua osasuna  
baiño ere naio.  
Nunbaitetik ajea  
azalduko zaio,  
ta gero egin bear  
munduari aio.
- 7/ Nik esaten nioten:  
«Eindakoak jan zik»,  
oraingo gizaldiak  
ez omen du gatzik.  
Nik ez det ezagutu  
ain aitona latzik,  
arek etzuen gaurko  
drogazalen antzik.
- 8/ Otoitz egiten diot  
joan dedin zerura,  
lanerako jaioa  
izan zan mundura.  
Baba zarra jan eta  
edan berriz ura,  
etzan biguiña izan  
aiton koxkor ura.

9/ Ta emaztea ere  
alakoa izan  
beti aitzurrarekin  
kankaka baratzan,  
gero ondo izango  
ziran esperantzan.  
Danak emen utzita  
gaixoa joan zan.

## **AMARENGANA BILDU GAITEZEN**

- 1/ Jakintsu bati itzalditxo bat  
entzun genion lenguan,  
ta esan zuen zarrentxoena  
gurea dala munduan.  
Garai batean dana euskeraz  
itzegiten zan orduan,  
erri maite au zero gozoa,  
jaunak, izango genduan.
  
- 2/ Zuzenbide ta errespetuan  
berdinduko zuten gutxik,  
orain ederki mudatu zaigu  
ta ez dauka lengo antzik.  
Zulatzailleak ugari ditu,  
etzaio falta arantzik,  
oiek dirade gure erriak  
jaso dituen galantzik.



- 3/ Orain nun dira aiton-amonen  
lengo oitura garbiak,  
zerutar usai gozoarekin  
Artzai on batek jarriak?  
Lur emalea nunbait izan au,  
bai igarri're etsaiak,  
on aundirik ez diote egin  
etorri ziran izaiak.
- 4/ Amaika aldiz aitatzen degun  
lenagoko lege zarra,  
banaka ezer gutxi gerade,  
bilduta degu indarra.  
Ez al da pena gu geren erruz  
onela ibili bearra?  
Onek orrela segitzen badu  
ez dator inpernu txarra.
- 5/ Babel'ko torre ura egiten  
aspaldi ziran asiak,  
ondo bukatu baiño lenago  
guztiak zeuden nasiak.  
Nunbait an ere etorri ziran  
une samin ta gaziak,  
orain olatsu gabiltza emen  
galduta gure graziak.

- 6/ Ondo pentsatu bear genduke  
gure izkuntza apala  
Euskalerrian sortu geranon  
Amatxo maitea dala.  
Berarengana bildu gaitezen  
oroituaz bat gerala,  
ez bestei kulpak bota ta gerok  
egin pekatu mortala.
- 7/ Indar aundiak artu dizkigu  
emen *zu pekataria*'k,  
batzuen erruz olaxen gaude  
gu orain emen jarriak.  
Gezurra jartzen bada agintzen  
alperrik dira egiak,  
guk, euskaldunak, badegu ordu  
zabaldutzeko begiak.
- 8/ Garai batean Euskalerriak  
bazuen bere itzala,  
Naparroa'ko Santxo errege  
mundu ontan bizi zala.  
Ura il zan da geroztikan da  
gu onela gabiltzala,  
bildu gaitezen Amarengana  
ta ondo gorde gaitzala.

## BERTSOLARI ZARRAK

- 1/ Eskola gutxirekin  
baziran azkarrak,  
garai artan emengo  
bertsolari zarrak.  
Ez det esango orain  
dauzkagunik txarrak,  
aiek ere kantatzen  
zituzten edarrak.
  
- 2/ Lenguan gazte batek  
asi ta segitun,  
etzirala gaurkoak  
ainbeste meritun.  
Prantzesa ta Txirrita  
ezagutu nitun,  
guk aiek oso ontzat  
eduki genitun.

- 3/ Gazteak gaurkoari  
ematen meritu,  
baiñan lengo aieri  
pixka bat begitu.  
Azkar bota bertsoa  
ta itza garbitu,  
naiz eskolaz gaurkoak  
aiña ez argitu.
- 4/ Gaur asko argitu da  
lengoen lanetik,  
danerako bazuten  
on eta txarretik,  
letzen eta idazten  
jakin gabe letrik;  
jaio egiten ordea  
iturri onetik.
- 5/ Orduan ezjakiñak  
ziradela baiño,  
ez da zanpatu bear  
zarra ortaraiño.  
Or daude ixpilluak  
Bilintx ta Otaño,  
aztuko ez diranak  
emen egundaiño.

- 6/ Zizurkil'go *Kattarro*'k  
etzuela bozik,  
gaur e artu liteke  
alakoia pozik.  
Lotatik zenbat ote  
ditu esnarazik?  
Maisurik aundiena  
bera gendun kasik.
- 7/ Aiek ziran orduko  
bertsolaien pitxi,  
maitasunai jarriak  
etzituen gutxi.  
Orain letzen ditugu,  
eskerrak Bilintxi,  
gogoan izango'ira  
biar eta etzi.
- 8/ Plazetan bertsolari,  
elizan kantore,  
etzan txarra izango  
Xenpelar bat ere.  
Idatzi zituenak  
paperean daude,  
maisurik bat izandu zan  
eskolarik gabe.

9/ Pena ematen dit au  
bukatu bearrak,  
gai ontan bazegoen  
jartzea edarrak.  
Beti izango dira  
onak eta txarrak,  
gora gaurko gazteak  
eta lengo zarrak!

## KUKUA

Bertso auk, lengo batean mendian nenbille-  
la, kukua kantari sumatu ta alaxe jarriak dira.

- 1/ Lengo batean mendira joan da  
or entzuten det kukua,  
kezketan nengon ote ziñaden  
betirako mututua,  
edo bestela zaputz-alдин bat  
zerbaitengatik artua;  
udaberriak berriz izketan  
or jarri digu mutua.

- 2/ Udaberriak badauzka ezin  
eskertu aiña meritu:  
negu beltzari bultzada eman  
da eguzkia argitu,  
soroak lore politez bete,  
arbolak osto-berritu;  
gauz oiek danak emen Norbaitek  
mirariak egin ditu.
- 3/ Neguan mutu egon ziranak  
ixilik beren zokuan,  
oiek dirade gure ispillu  
ta izan ditzagun kontuan.  
Udaberriak piztuta pozez  
berriz or dabiltz kanpuan,  
ostoz beteta apaindutako  
arbol-gaiñetan kantuan.
- 4/ Udaberria eta kukua,  
zuek dezute meritu,  
gure mendiak eta basoak  
kuku ta kuku alaitu.  
Segi aurrera ere olaxe,  
etzaitezela gelditu,  
negarrez dagon erri zar onek  
alaitasuna nai baitu.



- 5/ Nik ondo dakit negua dala  
gauza gogorra zuretzat,  
igartu eta uzten baititu  
ostoa eta loretzak.  
Guk maitasuna nola ez izan  
olako txori batentzat?  
Udaberrian etorri berriz,  
etzaituz aztu guretzat.
- 6/ Ixil-aldia egin ondoren  
azaldu udaberrian,  
negua ondo gordeta pasa  
arbol zarraren gerrian.  
Urtero zintzo kantatuko du  
an Erroma'ko zubian,  
ta berriz ere etorri eta  
kantatu gure mendian.
- 7/ Zure bidean zuzen zabilta,  
etzaitu inork nastuko,  
alaitu eta jartzen gaituzu  
goizean jeiki orduko.  
Zure kantua entzun nai degu,  
guk etzaitugu aztuko,  
zu etorriko ez baziñake  
gu ez giñake poztuko.

8/ Negarrez eta asarre dabil,  
arrazoi ere ez al du?  
Kantatutzera etorritzen da  
ta guk tiroka bialdu.  
Ibili zaitetz mendirik-mendi  
ta etzaitzela galdu,  
agur, kukua, Martxora arte,  
ta berriz ere azaldu!

## EZKONBERRI BATZUEI

Ezkontza batean bazkalondoan kantatutako bertsoak dira auek, Andoain'go *Borda* esaten dioten jatetxean. Andregaiia ikastola batean andereño da, ta orretxegatik esaten diot azken bertsoan esaten diodana.

- 1/ Agur, lenengo ezkonberriak,  
berdin aita eta amak,  
ta zuengatik bazkari ontan  
gaur bildu diraden danak.  
Bere garaian egitekoak  
dira onelako lanak,  
jan degunak on ein dezaigula  
eta gaitzik ez edanak.

- 2/ Bion arteko egarri ori  
ara gaur betiko ase,  
guraso zarrak beren garaian  
egin zuten bezelaxe.  
Alkar maiteak izan zaitezte,  
Mirentxu eta Juan Joxe,  
danon Jabeak urte askoan  
gorde ditzala olaxe.
- 3/ Ezkondutzeak ere baditu  
gauza gazi ta gozoak,  
urte askoan iraun dezala  
lotu zaituzten lazoak.  
Noizbait izaten zeratenean  
aurtxo baten gurasoak,  
ez gero aztu erakustea  
euskera ta errezoak.
- 4/ Barka zazute uste gabean  
zerbait esan badet gaizki,  
gure izkuntza euskera dala  
jakingo dezute noski.  
Ta zu, Juan Joxe, ibili lasai,  
ez kezkarikan eduki:  
umea nola ezi bear dan  
andereñoak badaki.

## ZAPELAITZ BATI

Bertso auek, gure amona zanari txitoak arrapatzen zizkion zapelaitz bati jarriak dira, ta onekin bukatzen det. Naikoak izango dira liburu ontarako noski.

- 1/ Egan dabiltzan egazti oiek  
ere badira trapaak,  
esango'izkizut, jakin ditzazun,  
zapelaitz baten kontuak.  
Anketan zenbat indar ote du  
ta muturrean mokuak?  
Sator da guzti eraman dizkit  
soroan neuzkan zepuak.

- 2/ Orrek metroko subeak ere  
azkar arrapatzen ditu,  
arbolan puntan jarriko da ta  
andik lurrera begitu.  
Sagu, sator da arratoi zarra,  
etzaitzela mugitu,  
bestela arek umeengana  
azkar eramango zaitu.
- 3/ Zapelaitz orrek bildurtzen ditu  
azeria ta katuak,  
esango'izkizut neronen begiz  
ikusitako kontuak.  
Gure etxean badauzkagu bi  
ondo eskarmentatuak,  
bati begia atera zion  
ark sartutako mokuak.
- 4/ Katu zar orrek ez baitzuen len  
orain ainbeste malezi,  
ta uste zuen orduan ere  
izango zala nagusi.  
Mokoa sartu begitikan da  
karrasi eta karrasi,  
katu gaixoa etxe aldera  
larri joan zan igesi.

- 5/ Ango zomorro danak jan zitun  
umeak azi baiño len,  
ark bazekien gure kolka ta  
bere txitoak nun zeuden.  
Etxe ondotik sagastiraiño  
ateratzen baziraden,  
estu ta larri ibiltzen ziran  
gu begira ez bageunden.
- 6/ Egun batean zan komeria  
gu danok deskuidatuta:  
etxe ondotik eraman zion  
txito aundi bat artuta.  
Kolka gaixoaren zalapartak  
bi egoak zabalduta!  
Denbora joanda desapioka  
amona asarretuta.
- 7/ Amaika txito bazuen jana,  
bai, zapelaitz moko-motzak,  
lanik txarrenak ematen zizkan  
burruka astean ontzak.  
Gure Joxeren eskupeta ark  
kañoak izan zorrotzak,  
ta egun batean kendu zizkion  
ipurdi aldeko otzak.

8/ Kontrarioak arrapatzea  
nunbait etzuen pentsatzen,  
oillaskoakin bere umeak  
zail du orain gobernatzen.  
Denborak ere bearko ditu  
atze-aldea sendatzen,  
eskarmentua sartu diote,  
ez da geiago azaltzen.




## AURKIBIDEA

Itzaurrea.....	7
Amets gozoa gazitu .....	9
Oraindik ez da bukatu .....	15
Jesus Abrego'ri .....	19
Epele'ko iturria.....	23
Gure arrantzaleak.....	27
Antziñako guraso zarrak .....	31
Zozo baten negarra .....	35
Aiton baten kezkek .....	39
Guraso zarren bizimodua.....	43
Idi zarrarena.....	47
Besarkada bat.....	51
Gizon zur baten kontuak .....	55
Ilargia.....	59
Barrutik negarrez.....	63
Aritz baten bizitza .....	67
Burdeos'ko peria .....	71
Ordutik gaurkora.....	75
Elio bertsolariari .....	79
Ura eta ardoa.....	83
Oraingo gauzak.....	87
Zakur bati .....	91
Len eta orain.....	95
Etzaigu faltako gerrik.....	99
Oria ibaiari .....	103
Utzi-aldi bat egin ondoren .....	107
Julian Gayarre'ri.....	111
Burutazioak.....	115
Lexoti bertsolariari .....	119
Ernani eta euskera .....	123

Guraso zarrak.....	127
Baserritar bati entzun ondoren.....	131
Tren txikien eriotza .....	135
Alkartu bearra .....	139
Lengo aitonak .....	143
Txakur bati .....	147
Israel ta arabeak.....	153
Kanada'ko baso-mutil batek esanak .....	157
Emengo egoera .....	161
Robotak.....	165
Katu zar bati.....	169
Europa batua .....	173
Iparraldeko senideak.....	177
Negozio berria .....	181
Bistan dauzkagun mirariak.....	185
Nere buruari.....	189
Ase eziñak.....	193
Amarengana bildu gaitzen .....	197
Bertsolari zarrak.....	201
Kukua .....	205
Ezkonberri batzuei.....	209
Zapelaitz bati .....	211

AZKUE BIBLIOTEKA EU-ERIZAN DIA BILBO
67626
1990 URR. 5
100970



AUSPOA  
LIBURUTEGIA



1009171  
BO-2112